


नमो नमो निम्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः



अंतगडदसाओ-अड्डमं अंगसुत्तं

मुनि दीपरत्नसागर

Date : / / 2012

Jain Aagam Online Series-8

८ गंथाणुककमो

कमंको	वग्गो	अज्झयणं	सुत्तं	गाहा	अणुककमो	पिट्ठंको
१	पढमो	१०	१-२	१-२	१-६	०२
२	बीओ	८	३-	३-	७-९	०३
३	तइओ	१३	४-७	-	१०-१४	०४
४	चउत्थो	१०	८-	४-	१५-१७	११
५	पंचमो	१०	९-११	५-	१८-२२	१२
६	छट्ठो	१६	१२-१५	६-७	२३-४०	१५
७	सत्तमो	१३	१६-	८-९	४१-४५	२२
८	अट्ठमो	१०	१७-२७	१०-१२	४६-६२	२३

८ अंतगडदसाओ-अड्डमं अंगसुत्तं

० पढमो वग्गो ०

॥ १-१०-अज्झयणाणि ॥

[१] तेणं कालेणं तेणं समएणं चंपा नामं नयरी, पुन्नभद्धे चेइए-वण्णओ, तेण कालेणं तेणं समएणं अज्जसुहम्ममे समोसरिए परिसा निग्गया जाव पडिगया ।

तेणं कालेणं तेणं समएणं अज्जसुहम्मस्स अंतेवासी अज्जजंबू जाव पज्जुवासमाणे एवं वयासी- जइ णं भंते समणेणं भगवया महावीरेणं आदिकरेणं जाव संपत्तेणं सत्तमस्स अंगस्स उवासगदसाणं अयमद्धे पन्नत्ते अड्डमस्स णं भंते! अंगस्स अंतगडदसाणं समणेणं० जाव संपत्तेणं के अद्धे पन्नत्ते?

एवं खलु जंबू! समणेणं जाव संपत्तेणं अड्डमस्स अंगस्स अंतगडदसाणं अड्ड वग्गा पन्नत्ता, जइ णं भंते! समणेणं जाव संपत्तेणं अड्डमस्स अंगस्स अंतगडदसाणं अड्ड वग्गा पन्नत्ता पढमस्स णं भंते! वग्गस्स अंतगडदसाणं समणेणं जाव संपत्तेणं कइ अज्झयणा पन्नत्ता?

एवं खलु जंबू! समणेणं जाव संपत्तेणं अड्डमस्स अंगस्स अंतगडदसाणं पढमस्स वग्गस्स दस अज्झयणा पन्नत्ता [तं जहा] ।

[२] गोयम समुद्ध सागर गंभीरे चेव होइ थिमिए य ।

अयले कंपिल्ले खलु अक्खोभ पसेणई विण्हू ॥

[३] जइ णं भंते! समणेणं भगवया महावीरेणं जाव संपत्तेणं अड्डमस्स अंगस्स अंतगडदसाणं पढमस्स वग्गस्स दस अज्झयणा पन्नत्ता पढमस्स णं भंते! अज्झयणस्स अंतगडदसाणं समणेणं जाव संपत्तेणं के अद्धे? पन्नत्ते,

एवं खलु जंबू! तेणं कालेणं तेणं समएणं बारवई नामं नयरी होत्था-दुवालस-जोयणायामा नवजोयणवित्थिण्णा धणवति-मइ-निम्मया चामीकर-पागारा नाणामणि-पंचवण्ण-कविसीसगमंडिया सुरम्मा अलकापुरि-संकासा पमुदिय-पक्कीलिया पच्चक्खं देवलोगभूया पासादीया दरिसणिज्जा अभिरूवा पडिरूवा ।

तीसे णं बारवईए नयरीए बहिया उत्तरपुरत्थिमे दिसीभाए एत्थ णं रेवयए नामं पव्वए-होत्था-वण्णओ, तत्थ णं रेवयए पव्वए नंदनवण्णे नामं उज्जाणे होत्था वण्णओ, सुरप्पिए नामं जक्खायतणे होत्था पोरणे०, से णं एगेणं वणसंडेणं०, असोगवरपायवे,

तत्थ णं बारवईए नयरीए कण्हे नामं वासुदेवे राया परिवसइ- महया रायवण्णओ, से णं तत्थ समुद्धविजयपामोक्खाणं दसण्हं दसाराणं- बलदेवपामोक्खाणं पंचण्हं महावीराणं पज्जुण्णपामोक्खाणं अद्धुद्धाणं कुमारकोडीणं संबपामोक्खाणं सट्ठीए दुद्धंतसाहस्सीणं महासेणपामोक्खाणं छप्पन्नाए बलगव-साहस्सीणं वीरसेणपामोक्खाणं एगवीसाए वीरसाहस्सीणं उग्गसेणपामोक्खाणं सोलसण्हं रायसाहस्सीणं रूप्पिणीपा-मोक्खाणं सोलसण्हं देवीसाहस्सीणं अनंगसेणपामोक्खाणं अणेगाणं गणियासाहस्सीणं, अण्णेसिं च बहूणं ईसर-जाव-सत्थवाहाणं बारावईए नयरीए अद्धभरहस्स य समत्थस्स आहेवच्चं जाव विहरइ ।

तत्थ णं बारवईए नयरीए अंधगवण्ही नामं राया परिवसइ, महयाहिमवंत वण्णओ, तस्स वग्गो-१, अज्झयणं-१-१०

णं अंधगवण्हिस्स रण्णो धारिणी नामं देवी होत्था वण्णओ, तए णं सा धारिणी देवी अण्णया कयाइ तंसि तारिसगंसि सयणिज्जंसि एवं जहा महब्बले ।

[४] सुमिणदंसण-कहणा जम्मं बालत्तणं कलाओ य ।
जोव्वण-पाणिग्गहणं कण्णा पासायभोगा य ॥

[५] नवरं- गोयमो नामेणं अट्टुहं रायवरकण्णाणं एगदिवसेणं पाणिं गेण्हावेति अट्टुओ दाओ, तेणं कालेणं तेणं समएणं अरहा अरिद्वनेमी आदिकरे जाव विहरइ चउव्विहा देवा आगया कण्हे वि निग्गए, तए णं तस्स गोयमस्स कुमारस्स जहा- मेहे तहा निग्गए धम्मं सोच्चा जं नवरं-देवाणुप्पिया! अम्मपियरो आपुच्छामि देवाणुप्पियाणं० एवं जहा- मेहे जाव अणगारे जाए जाव इणमेव निग्गंथं पावयणं पुरओ काउं विहरइ ।

तए णं से गोयमे अण्णया कयाइ अरहओ अरिद्वनेमिस्स तहारूवाणं थेराणं अंतिए सामाइ-यमाइयाइं एक्कारस अंगाइ अहिज्जइ अहिज्जित्ता बहूहिं चउत्थ-जाव भावेमाणे विहरइ, तए णं अरहा अरिद्वनेमी अण्णया कयाइ बारवईओ नयरीओ नंदणवणाओ पडिणिक्खमइ बहिया जणवयविहारं विहरइ ।

तए णं से गोयमे अणगारे अण्णया कयाई जेणेव अरहा अरिद्वनेमी तेणेव उवागच्छइ उवागच्छित्ता अरहं अरिद्वनेमिं तिक्खुत्तो आयाहिण-पयाहिणं करेइ० एवं वयासी-इच्छामि णं भंते! तुब्भेहिं अब्भणुण्णाए समाणे मासियं भिक्खुपडिमं उवसंपज्जित्ता णं विहरित्तए, एवं जहा- खंदओ तहा बारस भिक्खुपडिमाओ फासेइ, गुणरयणं पि तवोकम्मं तहेव फासेइ निरवसेसं जहा- खंदओ तहा चिंतेइ तहा आपुच्छइ तहा थेरेहिं सद्धिं सेत्तुंजं दुरूहइ, मासियाए संलेहणाए, बारस वरिसाइं परिताते जाव सिद्धे ।

[६] एवं खलु जंबू! समणेणं जाव संपत्तेणं अट्टमस्स अंगस्स अंतगडद-साणं पढमस्स वग्गस्स पढमस्स अज्झयणस्स अयमद्वे पन्नत्ते, एवं जहा- गोयमो तहा सेसा अंधगवण्ही पिया, धारिणी माया, समुद्वे सागरे थिमिए गंभीरे अयले कंपिल्ले अक्खोभे पसेणई विण्हू एए एगगमा ।

० पढमे वग्गे दस अज्झयणाणि समत्तानि ०

() पढमो वग्गो समत्तो ()

० मुनि दीपरत्नसागरेण संशोधितः सम्पादित्तश्च पढमो वग्गो समत्तो ०

० बीओ-वग्गो ०

[] १-८-अज्झयणाणि []

[७] जइ० दोच्चस्स वग्गस्स उक्खेवओ,

तेणं कालेणं तेणं समएणं बारवई नामं नयरी, होत्था, अंधगवण्ही पिया, धारिणी माया ।

[८] अक्खोभ सागरे खलु समुद्व हिमवंत अचलनामे य ।
धरणेय पूरणेय अभिचंदे चेव अट्टम ॥

[९] जहा- पढमो वग्गो तहा सव्वे अट्ट अज्झयणा, गुणरयणं तवोकम्मं सोलस वासाइं परियाओ सेत्तुंजे मासियाए संलेहणाए सिद्धा ।

० बीओ वग्गो समत्तो समत्तो ०

◦ मुनि दीपरत्नसागरेण संशोधितः सम्पादित्तश्च बीओ वग्गो समत्तो ◦

वग्गो-३, अज्झयणं-१,

◦ तइओ-वग्गो ◦

◻ पढमं अज्झयणं-अणीयसे ◻

[१०] जइ तच्चस्स उक्खेवतो◦

एवं खलु जंबू! अट्टमस्स अंगस्स अंतगडदसाणं तच्चस्स वग्गस्स तेरस अज्झयणा पन्नत्ता तं जहा- अणीयसे अणंतसेणे विऊ देवेसेणं सत्तुसेणे सारणे गए सुमुहे दुम्मुहे कूवए दारुए अणादिट्ठी,

जइ णं भंते! समणेणं भगवया महावीरेणं अट्टमस्स अंगस्स अंतगडदसाणं तच्चस्स वग्गस्स तेरस अज्झयणा पन्नत्ता, पढमस्स णं भंते! अज्झयणस्स अंतगडदसाणं के अट्ठे पन्नत्ते?,

एवं खलु जंबू! तेणं कालेणं तेणं समएणं भद्विलपुरे नामं नगरे होत्था वण्णओ, तस्स णं भद्विलपुरस्स उत्तरपुत्थिमे दिसीभाए सिरिवणे नामं उज्जाणे होत्था- वण्णओ, जियसत्तू राया, तत्थ णं भद्विलपुरे नयरे नागे नामं गाहावई होत्था- अट्ठे जाव अपरिभूए, तस्स णं नागस्स गाहावइस्स सुलसा नामं भारिया होत्था- सूमाला जाव सुरूवा ।

तस्स णं नागस्स गाहावइस्स पुत्ते सुलसाए भारियाए अत्तए अणीयसे नामं कुमारे होत्था- सूमाले जाव सुरूवे, पंचधाइपरिक्खत्ते तं जहा- दढपइण्णे जाव गिरिकंदरमल्लीणे◦ सुहंसुहेणं परिवइडइ तए णं तं अणीयसं कुमारं सातिरेग अट्टवासजायं जाणित्ता अम्मापियरो कलायरियस्स उवणेंति जाव भोग-समत्थे जाए यावि होत्था, तए णं तं अणीयसं कुमारं उम्मुक्कबालभावं जाणित्ता अम्मापियरो सरिसियाणं जाव बत्तीसाए इब्भवरकण्णगाणं एगदिवसेणं पाणिं गेण्हावेंति ।

तए णं से नागे गाहावई अणीयसस्स कुमारस्स इमं एयारूवं पीइदाणं दलयइ तं जहा- बत्तीस हिरण्णकोडीओ जहा- महब्बलस्स जाव उप्पिं पासायवरगए फुट्टमाणेहिं◦ विहरइ ।

तेणं कालेणं तेणं समएणं अरहा अरिद्वनेमी जाव समोसढे, सिरिवणे उज्जाणे जहा जाव विहरइ, परिसा निग्गया, तए णं तस्स अणीयसस्स कुमारस्स तं महा जहा- गोयमे तहा नवरं- सामाइयमाइयाइं चोदस पुव्वाइं अहिज्जइ, वीसं वासाइं परियाओ, सेसं तहेव जाव सेत्तुंजे पव्वए मासियाए संलेहणाए जाव सिद्धे ।

एवं खलुं जंबू! समणेणं भगवया महावीरेणं अट्टमस्स अंगस्स अंतगडदसाणं तच्चस्स वग्गस्स पढमस्स अज्झयणस्स अयमट्ठे पन्नत्ते ।

◦ तइए वग्गे पढमं अज्झयणं समत्तं ◦

◻ २-६-अज्झयणाणि ◻

[११] एवं जहा- अणीयसे एवं सेसा वि अनंतसेणो जाव सत्तुसेणे अज्झयणा एक्कगमा बत्तीसओ दाओ वीसं वासा परियाओ चोदस पुव्वा सेत्तुंजे सिद्धा ।

◦ तइए वग्गे २-६ अज्झयणाणि समत्तानि ◦

◻ सत्तमं अज्झयणं-सारणे ◻

[१२] तेषं कालेणं तेषं समएणं बारवईए नयरीए जहा- पढमे, नवरं- वसुदेवे राया, धारणी वग्गो-३, अज्झयणं-७,

देवी, सीहो सुम्पिणे, सारणे कुमारे, पन्नासओ दाओ, चोद्धस पुच्चा, वीसं वासा परियाओ, सेसं जहा- गोयमस्स जाव सेत्तुंजे सिद्धे ।

० तइए वग्गे सत्तमं अज्झयणं समत्तं ०

□ अट्टमं अज्झयणं- गए □

[१३] जइ उक्खेवओ अट्टमस्स, एवं खलु जंबू! तेषं कालेणं तेषं समएणं समएणं बारवईए नयरीए जहा- पढमे जाव अरहा अरिद्धनेमी समोसढे । तेषं कालेणं तेषं समएणं अरहओ अरिद्धनेमिस्स अंतेवासी छ अणगारा भायरो सहोदरा होत्था- सरिसया सरित्तया सरिच्चया नीलुप्पल-गवल-गुलिय-अयसिकुसुमप्पगासा सिरिवच्छंक्रिय-वच्छा कुसुम-कुंडलभद्दलया नलकूबर समाणा ।

तए णं ते छ अणगारा जं चव दिवसं मुंडा भवित्ता अगाराओ अमगारियं पव्वइया तं चव दिवसं अरहं अरिद्धनेमिं वंदंति नमंसंति वंदित्ता नमंसित्ता एवं वयासी- इच्छामो णं भंते! तुब्भेहिं अब्भणुण्णाया समाणा जावज्जीवाए छट्ठंछट्ठेणं अणिक्खित्तेणं तवोकम्मणं संजमेणं तवसा अप्पाणं भावेमाणा विहरित्तए, अहासुहं देवाणुप्पिया! मा पडिबंधं करेह ।

तए णं ते छ अणगारा अरहया अरिद्धनेमिणा अब्भणुण्णाया समाणा जावज्जीवाए छट्ठं-छट्ठेणं जाव विहरंति, तए णं ते छ अणगारा अण्णया कयाई छट्ठकखमणपारणयंसि पढमाए पोरिसीए सज्झायं करंति जह गोयमो जाव इच्छामो णं भंते छट्ठकखमणस्स पारणाए तुब्भेहिं अब्भणुण्णाया समाणा तिहिं संघाडएहिं बारवईए नयरीए जाव अडित्तए, अहासुहं०

तए णं ते छ अणगारा अरहया अरिद्धनेमिणा अब्भणुण्णाया समाणा अरहं अरिद्धनेमिं वंदंति नमंसंति वंदित्ता नमंसित्ता अरहओ अरिद्धनेमि अंतियाओ सहसंबवणाओ पडिनिक्खमंति पडिनिक्खमित्ता तिहिं संघाडएहिं अतुरियं जाव अडंति, तत्थ णं एगे संघाडए बारवईए नयरीए उच्च-नीय-मज्झिमाइं कुलाइं घरसमुदाणस्स मिक्खायरियाए अडमाणे अडमाणे वसुदेवस्स रण्णे देवईए देवीए गेहे अनुप्पविट्ठे, तए णं सा देवई देवी ते अणगारे एज्जमाणे पासइ-पासित्ता हट्ठ-जाव हियया आसणाओ अब्भुट्ठेइ अब्भुट्ठेत्ता सत्तट्ठ पदाइं नुगच्छइ तिक्खुत्तो आयाहिण पयाहिणं करेइ करेत्ता वंदइ नमंसइ वंदित्ता नमंसित्ता जेणेव भत्तघरणे तेषेव उवागया सीहकेसराणं मोयगाणं थालं भरेइ ते अणगारे पडिलाभेइ वंदइ नमंसइ वंदित्ता नमंसित्ता पडिविसज्जेइ तयाणंतरं च णं दोच्चे संघाडए बारवईए उच्च जाव पडिविसज्जेइ,

तयाणंतरं च णं तच्चे संघाडए बारवईए नगरीए जाव पडिलाभेइ पडिलाभेत्ता एवं वयासी-किण्णं देवाणुप्पिया! कण्हस्स वासुदेस्स इमीसे बारवईए नयरीए नवजोयणवित्थिण्णाए जाव पच्चक्खं देवलोगभूयाए समाणा निग्गंथा उच्च-नीय जाव अडमाणा भत्तपाणं नो लभंति जण्णं ताइं चव कुलाइं भत्तपाणाए भुज्जो-भुज्जो अनुप्पविसंति? ।

तए णं ते अणगारा देवइं देविं एवं वयासी-नो खलु देवाणुप्पिया! कण्हस्स वासुदेवस्स इमीसे बारवईए नयरीए जाव देवलोगभूयाए समाणा निग्गंथा उच्च-नीय जाव अडमाणा भत्तपाणं नो लभंति नो चव णंताइं ताइं चव कुलाइं दोच्चं पि तच्चं पि भत्तपाणाए अनुपविसंति, एवं खलु देवाणुप्पिए!

अम्हे भद्विलपुरे नगरे नागस्स गाहावइस्स पुत्ता सुलसाए भारियाए अत्तया छ भायरो सहोदरा सरिसया जाव नल-

वग्गो-३, अज्झयणं-८

कूबर-समाणा अरहओ अरिद्वनेमिस्स अंतिए धम्मं सोच्चा संसारभउव्विग्गा भीया जम्मणमरणाणं मुंडा जाव पव्वइया ।

तए णं अम्हे जं चेव दिवसं पव्वइआ तं चेव दिवसं अरह अरिद्वनेमिं वंदामो नमंसामो इमं एयारूवं अभिग्गहं अभिगिण्हामो-इच्छामो णं भंते! तुब्भेहिं अब्भणुण्णाया समाणा जाव अहासुहं, तए णं अम्हे अरहया अरिद्वनेमिणा अब्भणुण्णाया समाणा जावज्जीवाए छड्डंछट्टेणं जाव विहरामो, तं अम्हे अज्ज छड्डक्खमणपारणयंसि पढमाए पोरिसीए सज्झायं करेत्ता जाव अडमाणा तव गेहं अनुप्पविट्ठा, तं नो खलु देवाणुप्पिए! ते चेव णं अम्हे, अम्हे णं अण्णे, देवइं देविं एवं वदंति वदित्ता जामेव दिसं पाउब्भूया तामेव दिसं पडिगया ।

तए णं तीसे देवईए देवीए अयमेयारूवे अज्झत्थिए चिंतिए पत्थिए मणोगए संकप्पे समुप्पण्णे-एवं खलु अहं पोलासपुरे नयरे अतिमुत्तेणं कुमारसमणेणं बालत्तणे वागरिआ-तुमण्णं देवाणुप्पिए अट्ट पुत्ते पयाइस्ससि सरिसए जाव नलकूबर-समाणे नो चेव णं भरहे वासे अण्णाओ अम्मयाओ तारिसए पुत्ते पयाइस्संति तं णं मिच्छा इमं णं पच्चक्खमेव दिस्सइ-भरहे वासे अण्णाओ वि अम्मयाओ खलु एरिसए पुत्तो पयायाओ, तं गच्छामि णं अरहं अरिद्वनेमिं वंदामि वंदित्ता इमं च णं एयारूवं वागरणं पुच्छिस्सामीत्ति कट्टु एवं संपेहेइ संपेहेत्ता कोडुंबियपुरिसे सद्दावेइ सद्दावेत्ता एवं वयासी-धम्मियं जाणप्पवरं जाव उवडुव्वेत्ति, जहा- देवाणंदा जाव पज्जुवासइ, तए णं अरहा अरिद्वनेमी देवइ देविं एवं वयासी-से नूणं तव देवई इमे छ अमगारे पासित्ता अयमेयारूवे अज्झत्थिए जाव समुप्पण्णे-एवं खलु अहं पोलासपुरे नयरे अइमुत्तेणं कुमारसमणेणं बालत्तणे वागरिआ तं चेव जाव निग्गच्छित्ता मम अंतियं हव्वमागया से नूणं देवई अट्टे समट्टे?, हंता अत्थि ।

एवं खलुं देवाणुप्पियए! तेणं कालेणं तेणं समणं भद्विलपुरे नयरे नागे नामं गाहावई परिवसइ-अइडे० तस्स णं नागस्स गाहावइस्स सुलसा नामं भारिया होत्था, तए णं सा सुलसा गाहावइणी बालत्तणे चेव नेमित्तिएणं वागरिया- एस णं दारिया निंदू भविस्सइ, तए णं सा सुलसा बालप्पभिइं चेव हरिणेगमेसीभत्तया यावि होत्था हरि-नेगमेसिस्स पडिमं करेइ करेत्ता कल्लाकल्लिं पहाया जाव पायच्छित्ता उल्लपडसाडया महरिहं पुप्फचचणं करेइ करेत्ता जण्णुपायपडिया पणामं करेइ करेत्ता तओ पच्छा आहारेइ वा नीहारेइ वरति वा, तए णं तीसे सुलसाए गाहावइणीए भत्तिबहुमाणसुस्सूसाए हरिनेगमेसी देवे आराहिए यावि होत्था ।

तए णं से हरिनेगमेसी देवे सुलसाए गाहावइणीए अनुकंपणट्टयाए सुलसं गाहावइणिं तुमं च दो वि समउउयाओ करेइ, तए णं तुब्भे दो वि सममेव गब्भे गिण्हइ सममेव गब्भे परिवहह सममेव दारए पयायह, तए णं सा सुलसा गाहावइणी विणिहायमावण्णे दारए पयायइ, तए णं से हरिनेगमेसी देवे सुलसाए गाहावइणीए अनुकंपणट्टयाए विणिहायमावण्णे दारए करयल-संपुडेणं गेण्हइ गेण्हित्ता तव अंतियं साहरइ साहरित्ता तं समयं च णं तुमं पि नवण्हं मासाणं० सुकुमालदारए पसवसि जे वि य णं देवाणुप्पिए तव पुत्ता ते वि य तव अंतिआओ करयल-संपुडेणं गेण्हइ गेण्हित्ता सुलसाए गाहावइणीए अंतिए साहरइ, तं तव चेव णं देवई एए पुत्ता नो सुलसाए गाहावइणीए ।

तए णं सा देवई देवी अरहओ अरिद्वनेमिस्स अंतिए एयमइं सोच्चा निसम्म जाव-हियया अरहं अरिद्वनेमिं वंदइ नमंसइ वंदित्ता नमंसित्ता जेणेव ते छ अणगारा तेणेव उवागच्छइ उवागच्छित्ता ते

वग्गो-३, अज्झयणं-८

छप्पि अणगारा वंदइ नमंसइ वंदित्ता नमंसित्ता आगयपण्हया पप्फुयलोयणा कंचुयपरक्खित्तया दरियवलय-बाहा धाराहय-कलंब-पुप्फगं विव समूससिय-रोमकूवा ते छप्पि अणगारे अणिमिसाए दिट्ठीए पेहमाणी-पेहमाणी सुचिरं निरिक्खइ निरिक्खित्ता वंदइ नमंसइ वंदित्ता नमंसित्ता जेणेव अरहा अरिद्वनेमी तेणेव उवागच्छइ उवागच्छित्ता अरहं अरिद्वनेमिं तिक्खुत्तो आयाहिण-पयाहिणं करेइ जाव नमंसित्ता तमेव धम्मियं जाणप्पवरं दुरुहइ दुरुहित्ता जेणेव बारवई नयरी तेणेव उवागच्छइ उवागच्छित्ता बारवई नयरिं अनुप्पविसइ अनुप्पविसित्ता जेणेव सए गिहे बाहिरिया उवट्ठाणसाला तेणेव उवागया धम्मयाओ जाणप्प-वराओ पच्चोरूहइ पच्चोरूहित्ता जेणेव सए वासधरे जेणेव सए सयणिज्जे तेणेव उवागया सयंसि सय-णिज्जंसि निसीयइ ।

तए णं तीसे देवईए देवीए अयं अज्झत्थिए चिंतिए पत्थिए मणोगए संकप्पे समुप्पन्ने-एवं खलु अहं सरिसए जाव नलकूबर-समाणे सत्त पुत्ते पयाय, नो चेव णं मए एगस्स वि बालत्तणए समणुब्भूए, एस वि य णं कण्हे बालसुदेवे छण्हं-छण्हं मासाणं ममं अंतियं पायवंदए हव्वमागच्छइ, तं धण्णाओ णं ताओ अम्मयाओ० जासिं मण्णे नियग-कुच्छि-संभूतयाइं थणदुद्ध-लुद्धयाइं महर-समुल्लावयाइं मम्मण-पंजपियाइं थण मूल कक्खदेसभागं अभिसरमाणाइं मुद्धयाइं पुणो य कोमल-कमललोवमेहिं हत्थेहिं गिण्हिऊण उच्छंग निवेसियाइं दैति समुल्लावए सुमहुरे पुणो-पुणो मंजुलप्पमणिए, अहं णं अधण्णा अपुण्णा अकयपुन्ना अकयलक्खणा एत्तो एक्कतरमवि न पत्ता, ओहय जाव झियायइ ।

इमं च णं कण्हे वासुदेवे ण्हाए जाव विभूसिए, देवईए देवीए पायवंदए हव्वमागच्छइ ।

तए णं से कण्हे वासुदेवे देवइं देविं पासइ पासित्ता देवईए देवीए पायग्गहणं करेइ करेत्ता देविं एवं वयासी-अण्णया णं अम्मो! तुब्भे ममं पासेत्ता हट्ठतुट्ठा जाव भवह, किण्णं अम्मो! अज्ज तुब्भे ओहयमणसंकप्पा जाव झियायह?,

तए णं सा देवई देवी कण्हं वासुदेवं एवं वयासी-एवं खलु अहं पुत्ता! सरिसए जाव नलकूबर-समाणे सत्त पुत्ते पयाया नो चेव णं मए एगस्स वि बालत्तणे अनुब्भूए तुमं पि य णं पुत्ता! छण्हं-छण्हं मासाणं ममं अंतियं पायवंदए हव्वमागच्छसि तं धण्णाओ णं ताओ अम्मयाओ जाव झियामि ।

तए णं से कण्हे वासुदेवे देवइं देविं एवं वयासी-मा णं तुब्भे अम्मो! ओहयमणसंकप्पा जाव झियायह अहण्णं तहा घईस्सामि जहा- णं ममं सहोदरे कणीयसे भाउए भविस्सति त्ति कट्टु देवइ देविं ताहिं इट्ठाहिं वग्गूहिं समासासेइ तओ पडिणिक्खमइ पडिणिक्खमित्ता जेणेव पोसहसाला तेणेव उवागच्छइ उवागच्छित्ता जहा- अभओ नवरं हरिणेगमेसिस्स अट्टम भत्तं पगेण्हइ जाव अंजलिं कट्टु एवं वयासी-

इच्छामि णं देवाणुप्पिया! सहोदरं कणीयसं भाउयं विदिण्णं, तए णं से हरिणेगमेसी कण्हं वासुदेवं एवं वयासी- होहिइ णं देवाणुप्पिया तव देवलोयचुए सहोदरे कणीयसे भाउए से णं उम्मक्क जाव अणुप्पत्ते अरहओ अरिद्वनेमिस्स अंतियं मुंडे जाव पव्वइस्सइ, कण्हं वासुदेवं दोच्चं पि तच्चं पि एवं वदइ वदित्ता जामेव दिसं पाउब्भूए तामेव दिसं पडिगए ।

तए णं से कण्हे वासुदेवे पोसहसालाओ पडिनिवत्तइ पडिनिवत्तित्ता जेणेव देवई देवी तेणेव उवागच्छइ उवागच्छित्ता देवईए देवीए पायग्गहणं करेइ करेत्ता एवं वयासी-होहिए णं अम्मो! मम सहोदरे कणीयसे भाउए त्ति कट्टु देवइं देविं ताहिं इट्ठाहिं जाव आसासेइ आसासेत्ता जामेव दिसं पाउब्भूए तामेव दिसं पडिगए ।

वग्गो-३, अज्झयणं-८

तए णं सा देवई देवी अन्नया कयाइं तंसि तारिसगंसि वासघरंसि जाव सीहं सुमिणे पासित्ता पडिबुद्धा जाव पाढया हट्ठहियया परिवहइ ।

तए णं सा देवई देवी नवण्हं मासाणं जासुमण-रत्तबंधुजीवय-लक्खारस-सरसपारिजातक-तरुणदिवायर-समप्पभं सव्वणयणकंत-सुकुमालपाणिपायं जाव सुरूवं गयतालुसमाणं दारयं पयाया जम्मणं जहा- मेहकुमारे जाव जम्हा णं अम्हं इमे दारए गयतालुसमाणे तं होउ णं अम्हं एयस्स दारगस्स नामधेज्जे गयसुकुमाले, तए णं तस्स दारगस्स अम्मापियरो नामं कयं-गयसुकुमालो त्ति सेसं जहा- मेहे जाव अलं भोगसमत्ते जाए यावि होत्था ।

तत्थ णं बारवईए नयरीए सोमिले नाम माहणे परिवसइ-अड्ढे रिउव्वेय जाव सुपरिणिट्ठिए यावि होत्था, तस्स सोमिल-माहणस्स सोमसिरी नामं माहणी होत्था-सुकुमालपाणिपाया, तस्स णं सोमिलस्स धूता सोमसिरीए माहणीए अत्तया सोमा नामं दारिया होत्था, सोमाला जाव सुरूवा रूवेणं लावण्णेणं उक्किट्ठा उक्किट्ठसरीरा यावि होत्था, तए णं सा सोमा दारिया अण्णया कयाइ ण्हाया जाव विभूसिया बहूहिं खुज्जाहिं जाव परिक्खित्ता सयाओ गिहाओ पडिणिक्खमइ पडिणिक्खमित्ता जेणेव रायमग्गे तेणेव उवागच्छइ उवागच्छित्ता रायमग्गंसि कण्णगतिंदूसएणं कीलमाणी चिट्ठइ ।

तेणं कालेणं तेणं समएणं अरहा अरिद्धनेमी समोसढे, परिसा निग्गया, तए णं से कण्हे वासुदेवे इमीसे कहाए लद्धे समणे ण्हाए जाव विभूसिए गयसुकुमालेणं कुमारेणं सद्धिं हत्थिखंधवरगए सकोरेंटमल्लदामेणं छत्तेणं धरिज्जमाणेणं सेयवरचामराहिं उदुव्वमाणीहिं बारवईए नयरीए मज्झमज्झेणं अरहओ अरिद्धनेमिस्स पायवंदए निग्गच्छमाणे सोमं दारियं पासइ पासित्ता सोमाए दारियाए रूवेण य जोव्वणेण य लावण्णेण य जायविम्हए, कोडुंबियपुरिसे सद्दावेइ सद्दावेत्ता एवं वयासी-गच्छह णं तुब्भे देवाणुप्पिया० सोमिलं माहणं जायित्ता सोमं दारियं गेण्हह गेण्हित्ता कण्णंतेउरंसि पक्खिवह, तए णं से कण्हे एसा गयसुकुमालस्स कुमारस्स भारिया भविस्सइ, तए णं कोडुंबियपुरिसा तेव पक्खिवंति ।

तए णं से कण्हे वासुदेवे बारवईए नयरीए मज्झमज्झेणं निग्गच्छइ निग्गच्छित्ता जेणेव सहसंबवणे उज्जाणे जाव पज्जुवासइ, तए णं अरहा अरिद्धनेमी कण्हस्स वासुदेवस्स गयसुकुमालस्स कुमारस्स तीसे य० धम्मकहाए कण्हे पडिगए ।

तए णं से गयसुकुमाले अरहओ अरिद्धनेमिस्स अंतिए धम्मं सोच्चा जं नवरं अम्मापियरं आपुच्छामि जहा मेहो महेलियावज्जं जाव वड्ढियकुले, तए णं से कण्हे वासुदेवे इमीसे कहाए लद्धे समणे जेणेव गयसुकुमाले तेणेव उवागच्छइ उवागच्छित्ता गयसुकुमालं आलिंणइ आलिंणित्ता उच्छंगे निवेसेइ निवेसेत्ता एवं वयासी- तुमं णं ममं सहोदरे कणीयसे भाया तं मा णं तुं देवाणुप्पिया! इयाणिं रहओ मुंडे जाव पव्वायाहिं, अहण्णं तुमे बारवईए नयरीए महया-महया रायाभिसेएणं अभिसिंचिस्सामि, तए णं से गयसुकुमाले कण्हेणं वासुदेवेणं एवं वुत्ते समणे तुसिणीए संचिट्ठइ ।

तए णं से गयसुकुमाले कण्हं वासुदेवं अम्मापियरो य दोच्चं पि तच्चं पि एवं वयासी-एवं खलु देवाणुप्पिया! माणुस्सया कामभोगा खेलासवा जाव विप्पजहियज्जा भविस्संति, तं इच्छामि णं देवाणुप्पिया! तुब्भेहिं अब्भणुण्णाए समाणे अरहओ अरिद्वनेमिस्स अंतिए जाव पव्वइत्तए ।

तए णं तं गयसुकुमालं कण्हे वासुदेवे अम्मापियरो जं जाहे नो संचाएइ बहुयाहिं अनुलोमाहि जाव आघवित्तए ताहे अकामाइं चेव एवं वयासी-तं इच्छामो णं ते जाया! एगदिवसमवि रज्जसिरिं पासित्तए

वग्गो-३, अज्झयणं-८

निक्खमणं जहा महाबलस्स जाव तमाणाते तहा तहा जाव संजमित्तते,

तए णं से गयसुकुमाले जं चेव दिवसं पव्वइए तस्सेव दिवसस्स पच्चावरण्हकालसमयंसि जेणेव अरहा अरिद्वनेमी तेणेव उवागच्छइ उवागच्छित्ता अरहं अरिद्वनेमिं तिक्खुत्तो आयाहिण-पयाहिणं करेइ करेत्ता वंदइ नमंसइ वंदित्ता नमंसित्ता एवं वयासी- इच्छामि णं भंते! तुब्भेहिं अब्भणुण्णाए समाणे महाकालंसि सुसाणंसि एगराइयं महापडिमं उवसंपज्जित्ता णं विहरित्तए, अहासुहं देवाणुप्पिया! मा पडिबंधं करेहि, तए णं से गयसुकुमाले अमगारे अरहया अरिद्वनेमिणा अंतिए सहसंबवणाओ उज्जाणाओ पडिणिक्खमइ पडिणिक्खमित्ता जेणेव महाकाले सुसाणे तेणेव उवागए उवागच्छित्ता थंडिल्लं पडिलेहेइ पडिलेहित्ता उच्चारपासवणभूमिं पडिलेहइ पडिलेहेत्ता ईसिपब्भारगएणं काएणं जाव दो वि पाए साहट्टु एगराइं महापडिमं उवसंपज्जित्ता णं विहरइ ।

इमं च णं सोमिले माहणे सामिधेयस्स अट्टाए बारवईओ नयरीओ बहिया पुव्वणिग्गए समिहाओ य दब्भे य कुसे य पत्तामोडं य गेण्हइ गेण्हित्ता तओ पडिणियत्तइ पडिणियत्तित्ता महाकालस्स सुसाणस्स अदूरसामंतेणं वीईवयमाणे-वीईवयमाणे संझाकालसमयंसि पविरलमणुस्संसि गयसुकुमालं अणगारं पासइ पासित्ता तं वेरं सरइ सरित्ता आसुरुत्ते रुट्टे कुविए चंडिक्किए मिसिमिसेमाणे एवं वयासी-एस णं भो! से गयसुकुमाले कुमारे अपत्थिय जाव परिवज्जिए जेणं मम धूयं सोमसिरीए भारियाए अत्तयं सोमं दारियं अदिद्वदोसपत्तियं कालवत्तिणिं विप्पजहेत्ता मुंडे जाव पव्वइए तं सेयं खलु मम गयसुकुमालस्स कुमारस्स वेरनिज्जायणं करेत्तए-

एवं संपेहेइ संपेहेत्ता दिसापडिलेहणं करेइ करेत्ता सरसं मट्टियं गेण्हइ गेण्हित्ता जेणेव गयसुकुमाले अणगारे तेणेव उवागच्छइ उवागच्छित्ता गयसुकुमालस्स अणगारस्स मत्थए मट्टियाए पालि बंधइ बंधित्ता जलंतीओ चिययाओ फुल्लियकिंसुसमाणे खइरिंगाले कहल्लेणं गेण्हइ गेण्हित्ता गयसुकुमालस्स अणगारस्स मत्थए पक्खिवइ पक्खिवित्ता भीए तत्थे तसिए उव्विग्गे संजायभए तओ खिप्पामेव अवक्कमइ अवक्कमित्ता जामेव दिसं पाउब्भूए तामेव दिसं पडिगए ।

तए णं तस्स गयसुकुमालस्स अणगारस्स सरीरयंसि वेयणा पाउब्भूया- उज्जला जाव दुरहियासा, तए णं से गयसुकुमाले अणगारे सोमिलस्स माहणस्स मणसा वि अप्पदुस्समाणे तं उज्जलं जाव अहियासेइ, तए णं तस्स गयसुकुमालस्स अणगारस्स तं उज्जलं जाव अहियासेमाणस्स सुभेणं परिणामेणं पसत्थज्झवसाणेणं तदावरणिज्जाणं कम्मणं खएणं कम्मरयविकिरणकरं अपुव्वकरणं अनुप्प-विद्वस्स अनंते अनुत्तरे जाव केवलवरणाणदंसणे समुप्पन्ने, तओ पच्चा सिद्धे जाव सव्वदुक्खप्पहीणे, तत्थ णं अहासंनिहिणहिं देवेहिं सम्मं आराहिए त्ति कट्टु दिव्वे सुरभिगंधोदए वुट्टे दसद्ववण्णे कुसुमे निवाडिए चेलुक्खेवे कए दिव्वे य गीयगंधव्वणिणाए कए यावि होत्था ।

तए णं से कण्हे वासुदेवे कल्लं पाउप्पभायाए जाव जलंते, ण्हाए जाव विभूसिए, हत्थिखंध-
वरगए सकोरेंट-मल्लदामेणं छत्तेणं धरेज्जमाणेणं सेयवर-चामराहिं उद्धुव्वमाणीहिं महया भडचडगरपहकर-
वंदं परिक्खित्ते बारवइं नयरिं मज्झंमज्झेणं जेणेव अरहा अरिद्वनेमिं तेणेव पहारेत्थ गमणाए ।

तए णं से कण्हे वासुदेवे बारवईए नयरीए मज्झंमज्झेणं निग्गच्छमाणे एक्कं पुरिसं-जुण्णं
जरा-उज्जरिय-देहं जाव किलंतं महइमहालयाओ इट्ठगरासीओ एगमेगं इट्ठगं गहाय बहिया रत्थापहाओ
अंतोगिहं अनुप्पविसमाणं पासइ, तए णं से कण्हे वासुदेवे तस्स पुरिसस्स अनुकंपणट्ठाए हत्थिखंधवरगए
वग्गो-३, अज्झयणं-८

चेव एगं इट्ठगं गेण्हइ गेण्हित्त बहिया रत्थापहाओ अंतोगिहं अनुप्पवेसेइ, तए णं कण्हेणं वासुदेवेणं एगाए
इट्ठगाए गहियाए समाणीए अणेगेहिं पुरिससएहिं से महालए इट्ठगस्स रासी बहिया रत्थापहाओ अंतोघरंसि
अनुप्पवेसिए ।

तए णं से कण्हे वासुदेवे बारवईए नयरीए मज्झंमज्झेणं निग्गच्छइ निग्गच्छित्ता जेणेव
अरहा अरिद्वनेमि तेणेव उवागए उवागच्छित्ता जाव वंदइ नंसइ वंदित्ता नमंसित्ता गयसुकुमालं अणगारं
अपासमाणे अरहं अरिद्वनेमिं वंदइ नमंसइ वंदित्ता नमंसित्ता एवं वयासी- कहि णं भंते! से ममं सहोदरे
कणीयसे भाया गयसुकुमाले अमगारे जं णं अहं वंदामि नमंसामि ।

तए णं अरहा अरिद्वनेमी कण्हं वासुदेवं एवं वयासी- साहिए णं कण्हा! गयसुकुमालेणं
अणगारेणं अप्पणो अट्ठे, तए णं से कण्हे वासुदेवे अरहं अरिद्वनेमिं एवं वयासी-कहण्णं भंते! गयसूमा-लेणं
अणगारेणं साहिए अप्पणो अट्ठे? तए णं अरहा अरिद्वनेमी कण्हं वासुदेवं एवं वयासी-एवं खलु कण्हा!
गयसुकुमालेणं अणगारेणं ममं कल्लं पच्चावरण्हकालसमयंसि वंदइ नमंसइ वंदित्ता नमंसित्ता एवं
वयासी-इच्छामि णं भंते! जाव उवसंपज्जित्ता णं विहरइ तए णं तं गयसुकुमालं अणगारं एगे पुरिसे पासइ
पासित्ता आसुरूत्ते जाव सिद्धे । तं एवं खलु कण्हा! गयसुकुमालेणं अणगारेणं साहिए अप्पणो अट्ठे, तए
णं से कण्हे वासुदेवे अरहं अरिद्वनेमिं एवं वयासी-केस णं भंते! से पुरिसे अपत्थियपत्थिए जाव परिवज्जिए
जे णं ममं सहोदरं कणीयसं भायरं गयसुकुमालं अणगारं अकाले चेव जीवियाओ ववरोवेइ, तए णं अरहा
अरिद्वनेमी कण्हं वासुदेवं एवं वयासी- मा णं कण्हा! तुमं तस्स पुरिसस्स पदोसमावज्जाहि, एवं खलु
कण्हा! तेणं पुरिसेणं गयसुकुमालस्स अणगारस्स साहिज्जे दिण्णे, कहण्णं भंते! तेणं पुरिसेणं गयसुकुमा-
लस्स अणगारस्स साहिज्जे दिण्णे,

तए णं अरहा अरिद्वनेमी कण्हं वासुदेवं एवं वयासी- से नूणं कण्हा! तुमं ममं पायवंदए
हव्वागच्छमाणे बारवईए नयरीए एगं पुरिसं-पाससि जाव अनुपवेसिए, जहा- णं कण्हा! तुमं तस्स पुरिसस्स
साहिज्जे दिण्णे एवामेव कण्हा! तेणं पुरिसेणं गयसुकुमालस्स अणगारस्स अणेगभव-सयसहस्स-संचियं
कम्मं उदीरेमाणेणं बहुकम्मणिज्जरत्थं साहिज्जे दिण्णे ।

तए णं से कण्हे वासुदेवे अरहं अरिद्वनेमिं एवं वयासी- से णं भंते! पुरिसे मए क्हं
जाणियव्वे? तए णं अरहा अरिद्वनेमि कण्हं वासुदेवं एवं वयासी- जे णं कण्हा! तुमं बारवईए नयरीए
अनुप्पविसमाणं पासेत्ता ठियए चेव ठिइभेएणं कालं करिस्सइ तण्णं तुमं जाणिज्जासि एसं णं से पुरिसे,
तए णं से कण्हे वासुदेवे अरहं अरिद्वनेमिं वंदइ नमंसइ वंदित्ता नेमंसित्ता जेणेव आभिसेयं हत्थिरयणं
तेणेव उवागच्छइ उवागच्छित्ता हत्थिं दुरुहइ दुरुहित्ता जेणेव बारवई नयरी जेणेव सए गिहे तेणेव
पहारेत्थ गमणाए ।

तए णं तस्स सोमिलमाहणस्स कल्लं जाव जलंते अयमेयारूवे अज्झत्थिए चित्थिए पत्थिए मणोगए संकप्पे समुप्पन्ने- एवं खलु कण्हे वासुदेवे अरहं अरिद्धनेमिं पायवंदए निग्गए तं नायमेयं अरहया विण्णायमेयं अरहया सुयमेयं अरहया सिद्धमेयं अरहया भविस्सइ कण्हस्स वासुदेवस्स, तं न नज्जइ णं कण्हे वासुदेवे ममं केणइ कुमारेणं मारिस्सइ त्ति कट्टु भीए तत्थे तसिए उव्विग्गे संजायभए सयाओ गिहाओ पडिणिक्खमइ, कण्हस्स वासुदेवस्स बारवइं नयरिं अनुप्पविसमाणस्स पुरओ सपक्खिं सपडिदिसिं हव्वमागए ।

वग्गो-३, अज्झयणं-८

तए णं से सोमिले माहणे कण्हं वासुदेवं सहसा पासेत्ता भीए तत्थे तसिए उव्विग्गे संजायभए ठियए चेव ठिइभेयं कालं करेइ धरणितलंसि सव्वंगेहि धस त्ति सण्णिवडिए, तए णं से कण्हे वासुदेवे सोमिलं माहणं पासइ पासित्ता एवं वयासी- एस णं भो देवाणुप्पिया! से सोमिले माहणे अपत्थियपत्थिए जाव परिवज्जिए जेणं ममं सहोयरे कणीयसे भायरे गयसुकुमाले अणगारे अकाले चेव जीवियाओ ववरोविए त्ति कट्टु सोमिलं माहणं पाणेहिं कइढावेइं कइढावेत्ता तं भूमिं पाणिएणं अब्भोक्खावेइ अब्भोक्खावेत्ता जेणेव सए गिहे तेणेव उवागए सयं गिहं अनुप्पविट्ठे, एवं खलु जंबू! समणेणं भगवया महावीरेणं जाव संपत्तेणं अट्टमस्स अंगस्स अंतगडदसाणं तच्चस्स वग्गस्स अट्टमज्झयणस्स अयमट्ठे पन्नत्ते ।

◦ तइए वग्गे अट्टमं अज्झयणं समत्तं ◦

▣ ९-१३ अज्झयणाणि ▣

[१४] नवमस्स उ उक्खेवओ◦

एवं खलुं जंबू! तेणं कालेणं तेणं समएणं बारवइए नयरीए जहा- पढमए जाव विहरइ, तत्थ णं बारवइए बलदेवे नामं राया होत्था-वण्णओ, तस्स णं बलदेवस्स रण्णो धारिणी नामं देवी होत्था-वण्णओ, तए णं सा धारिणी◦ सीहं सुविणे पासित्ता णं पडिबुद्धा जहा- गोयमे नवरं- सुमुहे कुमारे पन्नासं कन्नाओ पन्नासओ दाओ चोद्दस पुव्वाइं अहिज्जइ वीसं वासाइं परियाओ सेसं तं चेव जाव सेत्तुंजे सिद्धे निक्खेवओ ।

एवं-दुम्महे वि कूवदारए वि तिण्णि वि बलदेवा-धारिणी-सुया दारुए वि एवं चेव, नवरं-वसुदेव-धारिणी-सुए । एवं-अणाहिट्ठी वि वसुदेव-धारिणी-सुए ।

एवं खलु जंबू! समणेणं जाव संपत्तेणं अट्टमस्स अंगस्स अंतगडदसाणं तच्चस्स वग्गस्स तेरसमस्स अज्झयणस्स अयमट्ठे पन्नत्ते ।

◦ तइए वग्गे ९-१३ अज्झयणाणि समत्तानि ◦

() तइओ वग्गो समत्तो ()

◦ मुनि दीपरत्नसागरेण संशोधितः सम्पादित्तश्च तइओ वग्गो समत्तो ◦

◦ चउत्थो-वग्गो ◦

▣ १-१०-अज्झयणाणि ▣

[१५] जइ णं भंते! समणेणं भगवया महावीरेणं जाव संपत्तेणं तच्चस्स वग्गस्स अयमद्वे पन्नत्ते चउत्थस्स के अद्वे पन्नत्ते?, एवं खलु जंबू! समणेणं भगवया महावीरेणं जाव संपत्तेणं चउत्थस्स वग्गस्स दस अज्झयणा पन्नत्ता, तं०-

[१६] जालि मयालि उवयाली पुरिससेणे वारिसेणे य ।
पज्जुण्ण संब अणिरुद्ध सच्चणेमि य दढणेमि ॥

[१७] जइ णं भंते! समणेणं जाव संपत्तेणं चउत्थस्स वग्गस्स दस अज्झयणा पन्नत्ता पढमस्स णं अज्झयणस्स के अद्वे पन्नत्ते?, एवं खलु जंबू! तेणं कालेणं तेणं समएणं बारवई नयरी, तीसे णं बारवईए नयरीए जहा-पढमे जाव कण्हे वासुदेवे आहेवच्चं जाव विहरइ, तत्थ णं बारवईए नगरीए वसु-वग्गो-४, अज्झयणं-१-१०

देवे राया धारिणी देवी-वण्णओ, जहा- गोयमो नवरं- जालिकुमारे पन्नासओ दाओ, बारसंगी, सोलस वासा परियाओ, सेसं जहा- गोयमस्स जाव सेत्तुंजे सिद्धे ।

एवं-मयाली उवयाली पुरिससेणे य वारिसेणे य । एवं-पज्जुण्णे वि, नवरं- कण्हे पिया रूपिणी माया । एवं-संबे वि, नवरं-जंबवई माया । एवं-अणिरुद्धे वि नवरं-पज्जुण्णे पिया वेदब्भी माया । एवं-सच्चनेमी, नवरं-समुद्विजए पिया सिवा माया, एवं-दढनेमी वि, सव्वे एगगमा, चउत्थवग्गस्स निक्खेवओ ।

◦ चउत्थो-वग्गो समत्तो ◦

◦ पंचमो-वग्गो ◦

◻ पढमं अज्झयणं- पउमावई ◻

[१८] जइ णं भंते! समणेणं भगवया महावीरेणं जाव संपत्तेणं चउत्थस्स वग्गस्स अयमद्वे पन्नत्ते, पंचमस्स वग्गस्स अंतगडदसाणं समणेणं जाव संपत्तेणं के अद्वे पन्नत्ते?, एवं खलु जंबू! समणेणं जाव संपत्तेणं पंचमस्स वग्गस्स दस अज्झयणा प० तं०-

[१९] पउमाई य गोरी गंधारी लक्खणा सुसीमा य ।
जंबवइ सच्चभामा रूपिणी मूलसिरि मूलदत्ता वि ॥

[२०] जइ णं भंते! पंचमस्स वग्गस्स दस अज्झयणा पन्नत्ता, पढमस्स णं भंते! अज्झयणस्स के अद्वे पन्नत्ते? एवं खलु जंबू! तेणं कालेणं तेणं समएणं बारवई नगरी जहा- पढमे जाव कण्हे वासुदेवे आहेवच्चं जाव विहरइ, तस्स णं कण्हस्स वासुदेवस्स पउमावई नाम देवी होत्था-वण्णओ ।

तेणं कालेणं तेणं समएणं अरहा अरिद्वनेमि समोसढे जाव विहरइ, कण्हे वासुदेवे निग्गए जाव पज्जुवासइ, तए णं सा पउमावई देवी इमीसे कहाए लद्धट्टा समाणी हट्टतुट्टा जहा- देवई देवी जाव पज्जुवासइ, तए णं अरहा अरिद्वनेमि कण्हस्स वासुदेवस्स पउमावईए य धम्मं कहा, परिसा पडिगया ।

तए णं कण्हे वासुदेवे अरहं अरिद्वनेमिं वंदइ नमंसइ वंदित्ता नमंसित्ता एवं वयासी- इमीसे णं भंते! बारवईए नगरीए नवजोयण वित्थिण्णाए जाव देवलोगभूयाए किंमूलाए विणासे भविस्सइ? कण्हाइ! अरहा अरिद्वनेमि कण्हं वासुदेवं एवं वयासी- एवं खलु कण्हा! इमीसे बारवईए नयरीए नवजोयण वित्थिण्णाए जाव देवलोगभूयाए सुरग्गिदीवायणमूलाए विणासे भविस्सइ, कण्हस्स वासुदेवस्स अरहओ अरिद्वनेमिस्स अंतिए एयं सोच्चा निसम्म अयं अज्झत्थिए चित्थिए मणोगए संकप्पे समुप्पज्जित्था-

घण्णा णं ते जालि मयालि-उवयालि-पुरिससेण-वारिसेण-पज्जुण्ण-संब-अणिरुद्ध-दढनेमि-सच्चनेमि-प्पभियओ कुमारा जे णं चइत्ता हिरण्णं जाव परिभाएत्ता अरहओ अरिद्वनेमिस्स अंतियं मुंडा जाव पव्वइया, अहण्णं अधण्णे अकयपुन्ने रज्जे य जाव अंतेउरे य माणुस्सएसु य कामभोगेसु मुच्छिए गढिए गिद्धे अज्झोववण्णे नो संचाएमि अरहओ अरिद्वनेमिस्स अंतिए पव्वइत्तए ।

कण्हाइ! अरहा अरिद्वनेमी कण्हं वासुदेवं एवं वयासी-से नूणं कण्हा! तव अयं अज्झत्थिए० जाव घण्णा णं ते जाव पव्वइत्तए, से नूणं कण्हा! अत्थे समत्थे? हंता अत्थि, तं नो खलु कण्हा! एतं भूतं वा भव्वं वा भविस्सइ वा जण्णं वासुदेवा चइत्ता हिरण्णं जाव पव्वइस्संति, से केणट्ठेणं भंते! एवं वुच्चइ

वग्गो-५, अज्झयणं-१

न एतं भूतं वा जाव पव्वइस्संति?

कण्हाइ! अरहा अरिद्वनेमी कण्हं वासुदेवं एवं वयासी-एवं खलु कण्हा! सव्वे वि य णं वासुदेवा पुव्वभवे निदाणकडा, से एतेणट्ठेणं कण्हा! एवं वुच्चइ न एतं भूतं वा जाव पव्वइस्संति, तए णं से कण्हे वासुदेवे अरहं अरिद्वनेमिं एवं वयासी-अहं णं भंते! इत्तो कालमासे कालं किच्चा कहिं गमिस्सामि? कहिं उववज्जिस्सामि?

तए णं अरहा अरिद्वनेमिं कण्हं वासुदेवं एवं वयासी-एवं खलु कण्हा! तुमं बारवईए नयरीए सुरग्गि-दीवायण-कोव-निदइढाए अम्मपिइ-नियग-विप्पहूणे रामेणं बलदेवेण सद्धिं दाहिणवेयालिं अभिमुहे जुहिद्विल्लापामोक्खाणं पंचण्हं पंडवाणं पंडुरायपुत्ताणं पासं पंडुमहुरं संपत्थिए कोसंबवणकाणणे नग्गोहवरपायवस्स अहे पुढविसिलापट्टए पीयवत्थ-पच्छाइय-सरीरे जराकुमारेणं तिक्खेणं कोदंड-विप्पमुक्केणं इसुणा वामे पादे विद्धे समाणे कालमासे कालं किच्चा तच्चाए वालुयप्पभाए पुढवीए उज्जलिए नरए नेरइयत्ताए उववज्जिहिसि ।

तए णं से कण्हे वासुदेवे अरहओ अरिद्वनेमिस्स अंतिए एयमट्ठं सोच्चा निसम्म ओहय जाव झियाइ, कण्हाइ! अरहा अरिद्वनेमि कण्हं वासुदेवं एवं वयासी-मा णं तुमं देवाणुप्पिया! ओहयमणसंकप्पे जाव झियाह, एवं खलु तुमं देवाणुप्पिया! तच्चाओ पुढवीओ उज्जलियाओ नरयाओ अणंतरं उव्वटित्ता इहेव जंबुद्धीवे दीवे भारहे वासे आगमेसाए उस्सप्पिणीए पुंडेसु जणवएसु सयदुवारे नगरे बारसमे अममे नामं अरहा भविस्ससि, तत्थ तुमं बहूइं वासाइं केवलि परियागं पाउणेत्ता सिज्झिहिसि बुज्झिहिसि मुच्चिहिसि परिनिव्वाहिसि सव्वदुक्खाणं अंतं काहिसि ।

तए णं से कण्हे वासुदेवे अरहओ अरिद्वनेमिस्स अंतिए एयमट्ठं सोच्चा निसम्मं हट्ठुट्ठे जाव अप्फोडेइ अप्फोडेत्ता वग्गइ वग्गित्ता तिवइं छिंदइ छिंदित्ता सीहणायं करेइ करेत्ता अरहं अरिद्वनेमिं वंदइ नमंसइ वंदित्ता नमंसित्ता तमेव आभिसेक्कं हत्थिं दुरुहइ दुरुहित्ता जेणेव बारवई नयरी जेणेव सए गिहे तेणेव उवागए आभिसेयहत्थिरयणाओ पच्चोरूहइ पच्चोरूहित्ता जेणेव बाहिरिया उवट्ठाणसाला जेणेव सए सीहासणे तेणेव उवागच्छइ उवागच्छित्ता सीहासणवरंसि पुरत्थाभिमुहे निसीयति निसीइत्ता कोडुंबिय पुरिसे सद्दावेइ सद्दावेत्ता एवं वयासी-गच्छह णं तुब्भे देवाणुप्पिया! बारवईए नयरीए सिंघाडग जाव उग्घोसेमाणा-उग्घोसेमाणा एवं वयह

एवं खलु देवाणुप्पिया! बारवईए नयरीए नवजोयण विच्छिण्णाए जाव देवलोमभूयाए सुरग्गि-दीवायण-मूलाए विणासे भविस्सइ, तं जो णं देवाणुप्पिया! इच्छइ बारवईए नयरीए राया वा

जुवराया वा ईसरे वा तलवरे वा माडंबिय-कोडुंबिय-इब्भ-सेट्टी वा देवी वा कुमारो वा कुमारी वा अरहओ अरिद्वनेमिस्स अंतिए मुंडे जाव पव्वइत्तए तं णं कण्हे वासुदेवे विसज्जेइ, पच्छातुरस्स वि य से अहापवित्तं वित्तिं अनुजाणइ महया इड्डिसक्कारसमुदएणं य से निक्खमणं करेइ, दोच्चं पि तच्चं पि घोसणयं घोसेह घोसेत्ता ममं एयं पच्चप्पिणह, तए णं ते कोडुंबिया जाव पच्चप्पिणंति ।

ते णं सा पउमावई देवी अरहओ अरिद्वनेमिस्स अंतिए धम्मं सोच्चा निसम्म हट्टुट्टु-चित्तमाणंदिय जाव हियया अरहं अरिद्वनेमिं वंदइ-नमंसइ वंदित्ता नमंसित्ता एवं वयासी- सद्दहामि णं भंते! निग्गंथं पावयणं से जहेयं तुब्भं वयह जं नवरं-देवाणुप्पिया! कण्हं वासुदेवं आपुच्छामि, तए णं अहं देवाणुप्पियाणं अंतिए मुंडा जाव पव्वयामि, अहासुहं

वग्गो-५, अज्झयणं-१

तए णं सा पउमावई देवी धम्मियं जाणप्पवरं दुरुहइ दुरुहित्ता जेणेव बारवई नयरी जेणेव सए गिहे तेणेव उवागच्छइ उवागच्छित्ता धम्मियाओ जाणप्पवराओ पच्चोरुहइ पच्चोरुहित्ता जेणेव कण्हे वासुदेवे तेणेव उवागच्छइ उवागच्छित्ता करयल जाव कट्टु कण्हं वासुदेवं एवं वयासी-इच्छामि णं देवाणुप्पिया! तुब्भेहिं अब्भणुण्णाया समाणी अरहओ अरिद्वनेमिस्स अंतिए मुंडा जाव पव्वइत्तए ।

अहासुहं, तए णं से कण्हे वासुदेवे कोडुंबियपुरिसे सद्दावेइ सद्दावेत्ता एवं वयासी-खिप्पामेव भो देवाणुप्पिया! पउमावईए देवीए महत्थं निक्खमणाभिसेयं उवडुवेह उवडुवेत्ता एयमाणत्तियं पच्च-प्पिणह, तए णं ते कोडुंबियपुरिसा जाव पच्चप्पणंति, तए णं से कण्हे वासुदेवे पउमावइं देविं पट्टयं दुरुहेइ अट्टसएणं सोवण्णकलसाणं जाव महाणिक्खमणाभिसेएणं अभिसिंचइ अभिसिंचित्ता सव्वालंकार-विभूसियं करेइ करेत्ता पुरिससहस्सवाहिणिं सिबियं दुरुहावेइ दुरुहावेत्ता बारवईए नयरीए मज्झंमज्झेणं निग्गच्छइ निग्गच्छित्ता जेणेव रेवयए पव्वए जेणेव सहसंबवणे उज्जाणे तेणेव उवागच्छइ उवागच्छित्ता सीयं ठवेइ ।

पउमावइं देविं सीयाओ पच्चोरुहइ पच्चोरुहित्ता जेणेव अरहा अरिद्वनेमी तेणेव उवागच्छइ उवागच्छित्ता अरहं अरिद्वनेमिं तिक्खुत्तो आयाहिण-पयाहिणं करेइ करेत्ता वंदइ नमंसइ वंदित्ता नमंसित्ता एवं वयासी-एस णं भंते! मम अग्गमहिंसी पउमावई नामं देवी इड्ढा कंता पिया मणुण्णा मणाभिरामा जाव किमंग पुण पासणयाएए?, तण्णं अहं देवाणुप्पिया! सिस्सिणिभिक्खं दलयामि पडिच्छंतु णं देवाणुप्पिया! सिस्सिणिभिक्खं, अहासुहं,

तए णं सा पउमावई उत्तरपुरत्थिमं दिसीभागं अवक्कमइ अवक्कमित्ता सयमेव आभरणालं-कारं ओमुयइ ओमुयित्ता सयमेव पंचमुट्टियं लोयं करेइ करेत्ता जेणेव अरहा अरिद्वनेमि तेणेव उवागच्छइ उवागच्छित्ता अरहं अरिद्वनेमिं वंदइ नमंसइ वंदित्ता नमंसित्ता एवं वयासी-आलित्ते जाव धम्ममाइक्खियं, तए णं अरहा अरिद्वनेमि पउमावइं देविं सयमेव पव्वावेइ पव्वावेत्ता सयमेव जक्खिणीए अज्जाए सिस्सि-णित्ताए दलयइ

तए णं सा जक्खिणी अज्जा पउमावइं देविं सयमेव पव्वावेइ जाव संजमेणं संजमियव्वं, तए णं सा पउमावई जाव संजमइ, तए णं सा पउमावई अज्जा जाया इरियासमिया जाव गुत्तबंधयारिणी, तए णं सा पउमावई अज्जा जक्खिणीए अज्जाए अंतिए सामाइयमाइयाइं एक्कारस अंगाइं अहिज्जइ, बहूहिं चउत्थ-छट्टुट्टु- विविहेहिं तवोकम्महेहि अप्पाणं भावेमाणे विहरइ, तए णं सा पउमावई अज्जा बहुपडिपुन्नाइं वीसं वासाइं सामण्णपरियागं पाउणइ पाउणित्ता मासियाए संलेहणाए अप्पाणं झूसेइ

झूसेत्ता सद्धिं भक्ताइं अणसणाए छेदेइ छेदेत्ता जस्सद्वाए कीरइ नग्गभावे मुंडभावे जाव तमद्धं आराहेइ चरिमुस्सासेहिं सिद्धा ।

◦ पंचमे वग्गे पढमं अज्झयणं समत्तं ◦

◻ २-८ अज्झयणाणि ◻

[२१] तेणं कालेणं तेणं समएणं बारवई नयरी रेवयए पव्वए उज्जाणे नंदवण्णे तत्थ णं बारवईए नयरीए कण्हे वासुदेवे तस्स णं कण्हस्स वासुदेवस्स गोरी देवी-वण्णओ अरहा समोसढे कण्हे निग्गए गोरी जहा- पउमावई तहा निग्गया, धम्मकहा, परिसा पडिगया, कण्हे वि ।
वग्गो-५, अज्झयणं-२-८

तए णं सा गोरी जहा- पउमावई तहा निक्खंता जाव सिद्धा । एवं-गंधारी, लक्खणा, सुसीमा, जंबवई, सच्चभामा, रूप्पिणी । अद्द वि पउमावईसरिसाओ अद्द अज्झयणा ।

◦ पंचमे वग्गे २-८ अज्झयणाणि समत्तानि ◦

◻ ९-१० अज्झयणाणि ◻

[२२] तेणं कालेणं तेणं समएणं बारवईए नयरीए रेवयए पव्वए नंदणवणे उज्जाणे कण्हे वासुदेवे तत्थ णं बारवईए नयरीए कण्हस्स वासुदेवस्स पुत्ते जंबवईए देवीए अत्तए संबे नामं कुमारे होत्था, अहीणपडिपुन्नपंचेदियसरीरे, तस्स णं संबस्स कुमारस्स मूलसिरी नामं भारिया होत्था वण्णओ, अरहा समोसढे कण्हे निग्गए मूलसिरी वि निग्गया जहा- पउमावई जं नवरं-देवाणुप्पिया! कण्हं वासुदेवं आपुच्छामि जाव सिद्धा एवं । मूलदत्ता वि ।

◦ पंचमे वग्गे ९-१० अज्झयणाणि समत्तानि ◦

() पंचमो वग्गो समत्तो ()

◦ मुनि दीपरत्नसागरेण संशोधितः सम्पादित्तश्च पंचमो वग्गो समत्तो ◦

◦ छट्ठो-वग्गो ◦

◻ १-२-अज्झयणाणि ◻

[२३] जइ छट्ठस्स उक्खेवओ नवरं सोलस अज्झयणा पन्नत्ता तं जहा- ।

[२४] मंकाइ किंकमे चेव मोगगरपाणी य कासवे ।

खेमए धिइहरे चेव केलासे हरिचंदणे ॥

[२५] वारत्त सुदंसण पुन्नभद्द तए सुमणभद्द सुपइद्दे ।

मेहेऽतिमुत्त अलक्के अज्झयणाणं तु सोलसयं ॥

[२६] जइ सोलस अज्झयणा पन्नत्ता पढमस्स अज्झयणस्स अंतगडदसाणं के अद्दे पन्नत्ते? एवं खलु जंबू! तेणं कालेणं तेणं समएणं रायगिहे नयरे, गुणसिलए चेइए, सेणिए राया, तत्थ णं मकाई नामं गाहावई परिवसइ-अइढे जाव अपरिभूए, तेणं कालेणं तेणं समएणं समणे भगवं महावीरे आदिकरे गुणसिलए जाव विहरइ, परिसा निग्गया ।

तए णं से मकाई गाहावई इमीसे कहाए लद्धे जहा- पन्नत्तीए गंगदत्ते तहेव इमो वि जेइपुत्तं कुडुंभे ठवेत्ता पुरिससहस्सवाहिणीए सीयाए निक्खंते जाव अमगारे जाए-इरियासमिए, तए णं से

मंकाई अणगारे समणस्स भगवओ महावीरस्स तहारूवाणं थेराणं अंतिए समाइयमाइयाइं एक्कारस अंगाइं अहिज्जइ सेसं जहा- खंदगस्स, गुणरयणं तवोकम्मं सोलसवासांइ परियाओ तहेव विउले सिद्धे । किंकमे वि एवं चेव जाव विउले सिद्धे ।

• छट्ठे वग्गे १-२ अज्झयणाणि समत्तानि •

□ तइयं अज्झयणं- मोग्गरमाणी □

[२७] तेणं कालेणं तेणं समएणं रायगिहे नयरे, गुणसिलए चेइए, सेणिए राया, चेल्लणा देवी, तत्थ णं रायगिहे नयरे अज्जुणए नामं मालागारे परिवसइ-अड्ढे जाव अपरिभूए, तस्स णं अज्जुण-यस्स मालायरस्स बंधुमई नामं भारिया होत्था-सूमालपाणिपाया, तस्स णं अज्जुणस्स मालायरस्स राय-वग्गो-६, अज्झयणं-३

गिहस्स नयरस्स बहिया एत्थ णं महं एगे पुप्फारामे होत्था-किण्हे जाव निउरूबभूए दसद्धवण्ण-कुसुमकुसुमिए पासाईए दरिसणिज्जे अभिरूवे पडिरूवे, तस्स णं पुप्फारामस्स अदूरसामंते एत्थ णं अज्जुणयस्स मालायरस्स अज्जय-पज्जय-पिइपज्जयागए अणेगकुलपुरिस-परंपरागए मोग्गर-पाणियस्स जक्खस्स जक्खयणे होत्था-पोराणे दिव्वे सच्चे जहा- पुन्नभद्दे तत्थ णं मोग्गरपाणिस्स पडिमा एगं महं पलसहस्सणिप्फण्णं अओमयं मोग्गरं गहाय चिट्ठइ ।

तए णं से अज्जुणए मालागारे बालप्पभिइं चेव मोग्गरपाणि-जक्खभत्ते यावि होत्था, कल्लाकल्लिं पच्छियपिडगाइं गेण्हइ गेण्हित्ता रायगिहाओ नयराओ पडिणिक्खमइ पडिणिक्खमित्ता जेणेव पुप्फारामे तेणेव उवागच्छइ उवागच्छित्ता पुप्फुच्चयं करेइ करेत्ता अग्गाइं वराइं पुप्फाइं गहाय जेणेव मोग्गरपाणिस्स जक्खस्स जक्खाययणे तेणेव उवागच्छइ उवागच्छित्ता मोग्गरपाणिस्स जक्खस्स महरिहं पुप्फुच्चयणं करेइ करेत्ता जण्णुपायपडिए पणामं करेइ, तओ पच्छा रायमग्गंसि वित्तिं कप्पेमाणे विहरइ ।

तत्थ णं रायगिहे नयरे ललिया नामं गोढी परिवसइ-अड्ढा जाव अपरिभूत्ता जं कयसुकया यावि होत्था, तए णं रायगिहे नगरे अण्णया कयाइ पमोदे घुट्ठे यावि होत्था, तए णं से अज्जुणए मालागारे कल्लं पभूयतराएहिं पुप्फेहिं कज्जं इति कट्ठु पच्चूसकालसमयंसि बंधुमईए भारियाए सद्धिं पच्छियपडियाइं गेण्हइ गेण्हित्ता सयाओ गिहाओ पडिणिक्खमइ पडिनिक्खमित्ता रायगिहं नगरं मज्झंमज्झेणं निग्गच्छइ निग्गच्छित्ता जेणेव पुप्फारामे तेणेव उवागच्छइ उवागच्छित्ता बंधुमईए भारियाए सद्धिं पुप्फुच्चयं करेइ ।

तए णं तीसे ललियाए गोढीए छ गोढिल्ला पुरिसा जेणेव मोग्गरपाणिस्स जक्खस्स जक्खायायणे तेणेव उवागया अभिरममाणा चिट्ठंति, तए णं से अज्जुणए मालागारे बंधुमईए भारियाए सद्धिं पुप्फुच्चयं करेइ, पत्थियं भरेइ भरेत्ता अग्गाइं वराइं पुप्फाइं गहाय जेणेव मोग्गरपाणिस्स जक्खस्स जक्खाययणे तेणेव उवागच्छइ, तए णं ते छ गोढिल्ला पुरिसा अज्जुणयं मालागारं बंधुमईए भारियाए सद्धिं एज्जमाणं पासंति पासित्ता अण्णमण्णं एवं वयासी-एस णं देवाणुप्पिया! अज्जुणए मालागारं अवओडयं-बंधणयं करेत्ता बंधुमईए भारियाए सद्धिं विउलाइं भोगभोगाइं भुंजमाण्णं विहरित्तए त्ति कट्ठु एयमट्ठं अण्णमण्णस्स पडिसुणेंति पडिसुणेत्ता कवाडंतरेसु निलुक्कंति निच्चला निप्फंदा तुसिणीया पच्छण्णा चिट्ठंति ।

तए णं से अज्जुणए मालागारे बंधुमईए भारियाए सद्धिं जेणेव मोग्गरपाणिस्स जक्खस्स जक्खाययणे तेणेव उवागच्छइ उवागच्छित्ता आलोए पणामं करेइ महरिहं पुप्फचचणं करेइ जण्णुपायपडिए पणामं करेइ, तए णं छ गोड्डिल्ला पुरिसा दवदवस्स क्वाडंतरेहिंतो निग्गच्छंति निग्गच्छित्ता अज्जुणयं मालागारं गेण्हंति गेण्हित्ता अवओडय बंधणं करेति बंधुमईए मालागारीए सद्धिं विउलाइं भोगभोगाइं भुंजमाणा विहरंति ।

तए णं तस्स अज्जुणयस्स मालागारस्स अयमज्झत्थिए चिंतिए पत्थिए मणोगए संकप्पे समुप्पज्जित्था-एवं खलु अहं बालप्पभिइं चेव मोग्गरपाणियस्स भगवओ कल्लाकल्लिं जाव कप्पेमाणे विहरामि, तं जइ णं मोग्गर-पाणी जक्खे इह सण्णिहिए होंते से णं किं ममं एयारूवं आवइं पावेज्जमाणं पासंते? तं नत्थि णं मोग्गरपाणी जक्खे इह सण्णिहिए, सुव्वत्तं णं एस कट्ठे,

तए णं से मोग्गरपाणी जक्खे अज्जुणयस्स मालागारस्स अयमेयारूवं अज्झत्थियं जाव वग्गो-६, अज्झयणं-३

वियाणेत्ता अज्जुणयस्स मालागारस्स सरीरयं अनुप्पविसइ अनुप्पविसित्ता तडतडस्स बंधाइ छिंदइ छिंदित्ता तं पलसहस्सणिप्फणं अयोमयं मोग्गरं गेण्हइ गेण्हित्ता ते इत्थिसत्तमे छ पुरिसे धाएइ, तए णं से अज्जुणए मालागारे मोग्गरपाणिया जक्खेणं अण्णाइट्ठे समाणे रायगिहस्स नगरस्स परिपेरंतेणं कल्ला-कल्लिं इत्थिसत्तमे छ पुरिसे घाएमाणे विहरइ ।

तए णं रायगिहे नयरे सिंघाडग-जाव महापहपहेसु बहुजणो अण्णमण्णस्स एवमाइक्खइ एवं भासेइ एवं पन्नवेइ एवं परूवेइ-एवं खलु देवाणुप्पिया! अज्जुणए मालागारे मोग्गरपाणिणा अण्णाइट्ठे समाणे रायगिहे नयरे बहिया इत्थिसत्तमे छ पुरिसे घाएमाणे विहरइ, तए णं से सेणिए राया इमीसे कहाए लद्धे समाणे कोडुंबियपुरिसे सद्दावेइ सद्दावेत्ता एवं वयासी-एवं खलु देवाणुप्पिया अज्जुणए मालागारे जाव घाएमाणे विहरइ, तं मा णं तुब्भे केइ कट्ठस्स वा तणस्स वा पाणियस्स वा पुप्फफलाणं वा अट्ठाए सइरं निग्गच्छइ मा णं तस्स सरीरयस्स वावत्ती भविस्सइ त्ति कट्ठु दोच्चं पि तच्चं पि घोसणयं घोसेह घोसेत्ता खिप्पामेव ममेयं पच्चप्पिणाह, तए णं से कोडुंबियपुरिसा जाव पच्चप्पिणंति ।

तत्थ णं रायगिहे नगरे सुदंसणे नामं सेट्ठी परिवसइ-अइटे, तए णं से सुदंसणे समणोवासए यावि होत्था-अभिगयजीवाजीवे जाव विहरइ, तेणं कालेणं समएणं समणे भगवं महावीरे जाव विहरइ, तए णं रायगिहे नगरे सिंघाडग० बहुजणो अण्णमण्णस्स एवमाइक्खइ जाव किमंग पुण विपुलस्स अट्ठस्स गहणयाए तए णं तस्स सुदंसणस्स बहुजणस्स अंतिए एयं सोच्चा निसम्मं अयं अज्झत्थिए चिंतिए पत्थिए मणोगए संकप्पे समुप्पज्जित्था-एवं खलु समणे भगवं महावीरे जाव विहरइ, तं गच्छामि णं समणं भगवं महावीरं वंदामि-एवं संपेहेइ संपेहेत्ता जेणेव अम्मपियरो तेणेव उवागच्छइ उवागच्छित्ता करयल अंजलिं कट्ठु एवं वयासी-एवं खलु अम्मयाओ समणे जाव विहरइ तं गच्छामि णं समणं भगवं महावीरं वंदामि नमंसामि जाव पज्जुवासामि ।

तए णं सुदंसणं सेट्ठिं अम्मपियरो एवं वयासी-एवं खलु पुत्ता! अज्जुणए मालागारे जाव घाएमाणे विहरइ, तं मा णं तुमं पुत्ता! समणं भगवं महावीरं वंदए निग्गच्छाहि, मा णं तव सरीरयस्स वावत्ती भविस्सइ, तुमणं इह गए चेव समणं भगवं महावीरं वंदाहि, तए णं से सुदंसणे सेट्ठी अम्मपियरं एवं वयासी-किण्णं तुमंह अम्मयाओ! समणं भगवं महावीरं इहमागयं इह पत्तं इह समोसटं इह गए चेव वंदिस्सामि? तं गच्छामि णं अहं अम्मयाओ! तुब्भेहिं अब्भणुण्णाए समाणे समणं भगवं महावीरं वंदए ।

ते णं सुदंसणं सेट्ठिं अम्मापियरो जाहे नो संचाएति बहूहिं आघवणाहिं पन्नवणाहिं सण्ण-
वणाहिं विण्णवणाहिं जाव परूवेत्तए ताहे एवं वयासी- अहासुहं० तए णं से सुदंसणे अम्मापिईहिं अब्भ-
णुण्णाए समाणे ण्हाए सुद्धप्पावेसाइं जाव सरीरे सयाओ गिहाओ पडिणिक्खमइ पडिणिक्खमित्ता
पायविहार-चारेणं रायगिहं नगरं मज्झंमज्झेणं निग्गच्छइ निग्गच्छित्ता मोग्गरपाणियस्स जक्खस्स
जक्खाययणस्स अदूरसामंतेणं जेणेव गुणसिलए चेइए जेणेव समणे भगवं महावीरे तेणेव पहारेत्थ गमणाए
।

तए णं से मोग्गरपाणी जक्खे सुदंसणं समणोवासयं अदूरसामंतेणं वीइवयमाणं वीईवयमाणं
पासइ पासित्ता आसुरुत्ते रुट्ठे कुविए चंडिक्कए मिसिमिसेमाणे तं पलसहस्सणिप्फण्णं अओमयं मोग्गरं
उल्लालेमाणे-उल्लालेमाणे जेणेव सुदंसणे समणोवासए तेणेव पहारेत्थ गमणाए तए णं से सुदंसणे समणो-
वासए मोग्गरपाणिं जक्खं एज्जमाणं पासइ पासित्ता अभीए अतत्थे अनुव्विग्गे अक्खुभिए अचल्लिए
असंभंते वत्थंतेणं भूमिं पमज्जइ पमज्जित्ता करयलं जाव कट्टु एवं वयासी-
वग्गो-६, अज्झयणं-३

नमोत्थु णं अरहंताणं जाव संपत्ताणं नमोत्थु णं समणस्स भगवओ महावीरस्स जाव
संपाविउकामस्स, पुव्विं पि णं मए समणस्स भगवओ महावीरस्स अंतिए थूलए पाणाइवाए पच्चक्खाए
जावज्जीवाए थूलए मुसावाए पच्चक्खाए जावज्जीवाए थूलए अदिन्नादाणे पच्चक्खाए जावज्जीवाए सदार-
संतोसे कए जावज्जीवाए इच्छापारिमाणे कए जावज्जीवाए, तं इदाणिं पि णं तस्सेव अंतियं सव्वं पाणाइ-
वायं पच्चक्खामि जावज्जीवाए मुसावायं अदत्तादाणं मेहुणं परिग्गहं पच्चक्खामि जावज्जीवाए सव्वं कोहं
जाव मिच्छादंसणसल्लं पच्चक्खामि जावज्जीवाए सव्वं असणं पाणं खाइमं साइमं चउव्विहं पि आहारं
पच्चक्खामि जावज्जीवाए, जइ णं एत्तो उवसग्गाओ मुच्चिस्सामि तो मे कप्पइ पारेत्तए अहण्णं एत्तो
उव-सग्गाओ मुच्चिस्सामि ततो मे तहा पच्चक्खाए चेव त्ति कट्टु सागारं पडिमं पडिवज्जइ ।

तए णं से मोग्गरपाणी जक्खे तं पलसहस्सणिप्फण्णं अओमयं मोग्गरं उल्लालेमाणे-
उल्लालेमाणे जेणेव सुदंसणे समणोवासए तेणेव उवागए नो चेव णं संचाएइ सुदंसणं समणोवासयं तेयसा
समभिपडित्तए, तए णं से मोग्गरपाणी जक्खे सुदंसणं समणोवासयं सव्वओ समंता परिघोलेमाणे-परघोले-
माणे जाहे नो चेव णं संचाएइ सुदंसणं समणोवासयं तेयसा समभिपडित्तए ताहे सुदंसणस्स समणोवा-
सयस्स पुरओ सपक्खिं सपडिदिसिं ठिच्चा सुदंसणं सणोवासयं अणिमिसाए दिट्ठिए सुचिरं निरिक्खइ
निरिक्खित्ता अज्जुणयस्स मालागरस्स सरीरं विप्पजहइ विप्पजहित्ता तं पलसहस्सणिप्फण्णं अओमयं
मोग्गरं गहाय जामेव दिसं पाउब्भूए तामेव दिसं पडिगए ।

तए णं से अज्जुणए मालागारे मोग्गरपाणिणा जक्खेणं विप्पमुक्के समाणे धस त्ति
धरणियलंसि सव्वंगेहिं निवडिए, तए णं से सुदंसणे समणोवासए निरुवसग्ग मिति कट्टु पडिमं पारेइ, तए
णं से अज्जुणए मालागारे तत्तो मुहुत्तंतरेणं आसत्थे समाणे उट्ठेइ उट्ठित्ता सुदंसणं समणोवासयं एवं
वयासी- तुब्भे णं देवाणुप्पिया! के कहिं वा संपत्थिया? तए णं से सुदंसणे समणोवासए अज्जुणयं
मालागारं एवं वयासी-एवं खलु देवाणुप्पिया! अहं सुदंसणे नामं समणोवासए-अभियजीवाजीवे गुणसिलए
चेइए समणं भगवं महावीरं वंदए संपत्थिए ।

तए णं से अज्जुणए मालागारे सुदंसणं समणोवासयं एवं वयासी- तं इच्छामि णं
देवाणुप्पिया! अहमवि तुमए सद्धिं समणं भगवं महावीरं वंदित्तए जाव पज्जुवासित्तए, अहासुहं

देवाणुप्पिया! तए णं सुदंसणं समणोवासए अज्जुणएणं मालागारेणं सद्धिं जेणेव गुणसिलए चेइए जेणेव समणे भगवं महावीरे तेणेव उवागच्छइ उवागच्छित्ता अज्जुणएणं मालागारेणं सद्धिं समणं भगवं महावीरं तिक्खुत्तो आयाहिण-पयाहिणं करेइ वंदइ वमंसइ जाव पज्जुवासइ ।

तए णं समणे भगवं महावीरे सुदंसणस्स समणोवासगस्स अज्जुणयस्स मालागारस्स तीसे य धम्ममाइक्खइ, सुदंसणे पडिगए, तए णं से अज्जुणए मालागारे समणस्स भगवओ महावीरस्स अंतिए धम्मं सोच्चा निसम्म हइ तुइ जाव एवं वयासी-सद्धहामि णं भंते निग्गंथं पावयणं जाव अब्भुट्टेमि, जाव अहासुहं ।

तए णं से अज्जुणए मालागारे उत्तरं सयमेव पंचमुट्ठियं लोयं करेइ करेत्ता जाव अणगारे जाए जाव विहरइ, तए णं से अज्जुणए अणगारे जं चेव दिवसं मुंडे जाव पव्वइए तं चेव दिवसं समणं भगवं महावीरं वंदइ नमंसइ वंदित्ता नमंसित्ता इमं एयारूवं अभिग्गहं ओगेण्हइ-कप्पइ मे जावज्जीवाए छट्ठंछट्ठेणं अणिक्खित्तेणं तवोकम्मणं अप्पाणं भावेमाणस्स विहरित्तए त्ति कट्टु, अयमेयारूवं अभिग्गहं वग्गो-६, अज्झयणं-८

ओगेण्हइ ओगेण्हित्ता जावज्जीवाए जाव विहरइ ।

तए णं से अज्जुणए अणगारे छट्ठक्खमणपारणयंसि पढमे पोरिसीए सज्झायं करेइ जहा-गोयमसामी जाव अडइ, तए णं तं अज्जुणयं अणगारं रायगिहे नयरे उच्च-जाव अडमाणं बहवे इत्थीओ य पुरिसा य डहरा य महल्ला य जुवाणा य एवं वयासी- इमे णं मे पिता मारिए इमे णं मे माता मारिया इमे णं मे भायां भगिणीं भज्जां पुत्तें धूयां सुण्हा मारिया, इमे णं मे अण्णयरे सयण-संबंधि-परियणे मारिए त्ति कट्टु अप्पेगइया अक्कोसंति अप्पेगइया हीलंति निंदंति गरिहंति तज्जंति तालेंति ।

तए णं से अज्जुणए अणगारे तेहिं बहूहिं इत्थीहि य पुरिसेहि य डहरेहि य महल्लेहि य जुवाणएहि य आओसिज्जमाणे जाव तालेज्जमाणे तेसिं मणसा वि अपउस्समाणे सम्मं सहइ सम्मं खमइ सम्मं तितिक्खइ सम्मं अहियासेइ सम्मं सहमाणे सम्मं खममाणे सम्मं तितिक्खमाणे सम्मं अहियासेमाणे रायगिहे नयरे उच्च-नीय-मज्झिय-कुलाइं अडमाणे जइ भत्तं लभइ तो पाणं न लभइ अह पाणं लभइ तो भत्तं न लभइ,

तए णं से अज्जुणए अणगारे अदीणे अविमणे अकलुसे अणाइले अविसादी अपरितंतजोगी अडइ अडित्ता रायगिहाओ नगराओ पडिणिक्खमइ पडिणिक्खमित्ता जेणेव गुणसिलए चेइए जेणेव समणे भगवं महावीरे जहा- गोयमसामी तहा पडिदंसेइ पडिदंसेत्ता समणेणं भगवया महावीरेणं अब्भणुण्णाए समाणे अमुच्छिए अगिद्धे अगट्टिए अणज्झोववण्णे बिलमिव पन्नगभूएणं अप्पाणेणं तमाहारं आहारेइ ।

तए णं समणे भगवं महावीरे अण्णया रायगिहाओ पडिणिक्खमइ पडिणिक्खमित्ता बहिया जणवयविहारं विहरइ, तए णं से अज्जुणए अणगारे तेणं ओरालेणं विपुलेणं पयत्तेणं पग्गहिएणं महाणुभागेणं तवोकम्मणं अप्पाणं भावेमाणे बहुपुडिपुन्ने छम्मासे सामण्णपरियागं पाउणइ पाउणित्ता अद्धमासियाए संलेहणाए अप्पाणं झूसेइ झूसेत्ता तीसं भत्ताइं अणसणाए छेदेइ छेदेत्ता जस्सट्टाए कीरइ नग्गभावे जाव सिद्धे ।

◦ छट्ठे वग्गे तइअं अज्झयणं समत्तं ◦

◻ चउत्थं-अज्झयणं ◻

[२८] तेषां कालेषां तेषां समेषां रायगिहे नगरे, गुणसिलए चेइए, सेणिए राया, कासवे नामं गाहावई परिवसइ जहा- मंकाई, सोलस वासा परियाओ, विपुले सिद्धे ।

◦ छट्टे वग्गे चउत्थं अज्झयणं समत्तं ◦

□ पंचमं-अज्झयणं □

[२९] एवं-खेमए वि गाहावई नवरं- कायंदी नयरी, सोलस वासा परियाओ, विपुले पव्वए सिद्धे ।

◦ छट्टे वग्गे पंचमं अज्झयणं समत्तं ◦

□ छट्ठं-अज्झयणं □

[३०] एवं-धिइहरे वि गाहावई कायंदीए नयरीए सोलस वासा परियाओ विपुले सिद्धे ।

◦ छट्टे वग्गे छट्ठं अज्झयणं समत्तं ◦

वग्गो-६, अज्झयणं-७

□ सत्तमं-अज्झयणं □

[३१] एवं-केलासे वि गाहावई नवरं-साएए नयरे, बारस वासाइं परियाओ, विपुले सिद्धे ।

◦ छट्टे वग्गे सत्तमं अज्झयणं समत्तं ◦

□ अट्ठमं-अज्झयणं □

[३२] एवं-हरिचंदणे वि गाहावई, साएए नयरे, बारस वासा परियाओ, विपुले सिद्धे ।

◦ छट्टे वग्गे अट्ठमं अज्झयणं समत्तं ◦

□ नवमं-अज्झयणं □

[३३] एवं-बारत्तए वि गाहावई नवरं-रायगिहे नगरे, बारस वासा परियाओ, विपुले सिद्धे ।

◦ छट्टे वग्गे नवमं अज्झयणं समत्तं ◦

□ दसमं-अज्झयणं □

[३४] एवं-सुदंसणे वि गाहावई नवरं-वाणियग्गामे नयरे, दूइपलासए चेइए, पंच वासा परियाओ विपुले सिद्धे ।

◦ छट्टे वग्गे दसमं अज्झयणं समत्तं ◦

□ इक्कारसमं-अज्झयणं □

[३५] एवं-पुन्नभट्टे वि गाहावई, वाणियग्गामे नयरे, पंचवासा परियाओ, विपुले सिद्धे ।

◦ छट्टे वग्गे इक्कारसमं अज्झयणं समत्तं ◦

□ बारसमं-अज्झयणं □

[३६] एवं-सुमणभट्टे वि गाहावई, सावत्थीए नयरीए, बहुवासाइं परियाओ, विपुले सिद्धे ।

◦ छट्टे वग्गे बारसमं अज्झयणं समत्तं ◦

□ तेरसमं-अज्झयणं □

[३७] एवं-सुपड्डे वि गाहावई, सावत्थीए नयरीए, सत्तावीसं वासा परियाओ, विपुले सिद्धे।

• छद्दे वग्गे तेरसमं अज्झयणं समत्तं •

□ चोदसमं-अज्झयणं □

[३८] एवं-मेहे वि गाहावई, रायगिहे नयरे, बहूइं वासाइ परियाओ, विपुले सिद्धे ।

□ पन्नरसमं अज्झयणं- अइमुत्ते □

[३९] तेणं कालेणं तेणं समएणं पोलासपुरे नगरे सिरिवणे उज्जाणे, तत्थ णं पोलासपुरे नयरे विजये नामं राया होत्था, तस्स णं विजयस्स रण्णो सिरि नामं देवी होत्था-वण्णओ, तस्स णं विजयस्स रण्णो पुत्ते सिरिए देवीए अत्तए अतिमुत्ते नामं कुमारे होत्था-सूमालपाणिपाए ।

तेणं कालेणं तेणं समएणं समणे भगवं महावीरे जाव सिरिवणे जाव विहरइ, तेणं कालेणं तेणं समएणं समणस्स भगवओ महावीरस्स जेहे अंतेवासी इंदभूती अणगारे जहा- पन्नत्तीए जाव पोला- वग्गो-६, अज्झयणं-१५

सपुरे नयरे उच्च जाव अडइ, इमं च णं अइमुत्ते कुमारे प्हाए जाव सव्वालंकारविभूसिए बहूहिं दारएहि य दारियाहि य डिंभएहि य डिंभियाहि य कुमारएहि य कुमारियाहि य सद्धिं संपरिवुडे साओ गिहाओ पडि- णिक्खमइ पडिणिक्खमित्ता जेणेव इंदट्टाणे तेणेव उवागए तेहिं बहूहिं दारएहि य संपरिवुडे अभिरममाने- अभिरममाणे विहरइ ।

तए णं भगवं गोयमे पोलासपुरे नयरे उच्चनीय-जाव अडमाणे इंदट्टाणस्स अदूरसामंतेणं वीइवयइ तए णं से अइमुत्ते कुमारे भगवं गोयमं अदूरसामंतेणं वीइवयमाणं पासइ पासित्ता जेणेव भगवं गोयमे तेणेव उवागए भगवं गोयमं एवं वयासी-के णं भंते! तुब्भे किं वा अडह?

तए णं भगवं गोयमे अइमुत्ते कुमारं एवं वयासी-अम्हे णं देवाणुप्पिया समणा निग्गंथा इरियासमिया जाव गुत्तबंभयारी उच्चनीय-जाव अडामो, तए णं अइमुत्ते कुमारे भगवं गोयमं एवं वयासी- एह णं भंते! तुब्भे जा णं अहं तुब्भं भिक्खं दवावेमी त्ति कट्टु भगवं गोयमं अंगुलीए गेणहइ गेण्हित्ता जेणेव सए गिहे तेणेव उवागए, तए णं से सिरिदेवी भगवं गोयमं एज्जमाणं पासइ पासित्ता हट्टुट्टा आसणाओ अब्भुट्टेइ अब्भुट्टेत्ता जेणेव भगवं गोयमे तेणेव उवागया भगवं गोयमं तिक्खुत्तो आयाहिण- पयाहिणं० वंदइ वंदित्ता विउलेणं असण-पाण-खाइम-साइमेणं पडिलाभेत्ता पडिविसज्जेइ ।

तए णं से अइमुत्ते कुमारे भगवं गोयमं एवं वयासी-कहिं णं भंते तुब्भे परिवसह? तए णं से भगवं गोयमे अइमुत्तं कुमारं एवं वयासी-एवं खलु देवाणुप्पिया मम धम्मयारिए धम्मोवएसए समणे भगवं महावीरे आइगरे जाव संपाविउकामे इहेव पोलासपुरस्स नगरस्स बहिया सिरिवणे उज्जाणे अहापडिरूवं ओग्गहं ओगिण्हित्ता संजमेणं जाव भावेमाणे विहरइ, तत्थ णं अम्हे परिवसामो ।

तए णं से अइमुत्ते कुमारे भगवं गोयमं एवं वयासी- गच्छामि णं भंते! अहं तुब्भेहिं सद्धिं समणं महावीरं पायवंदए? अहासुहं० तए णं से अइमुत्ते कुमारे भगवं गोयमेणं सद्धिं जेणेव समणे भगवं महावीरे तेणेव उवागच्छइ उवागच्छित्ता समणं भगवं महावीरं तिक्खुत्तो आयाहिण-पयाहिणं करेइ करेत्ता वंदइ जाव पज्जुवासइ,

तए णं भगवं गोयमे जेणेव समणे भगवं महावीरे तेणेव उवागए जाव पडिदंसेइ पडिदंसेत्ता संजमेणं तवसा० अप्पाणं भावेमाणे विहरइ ।

तए णं समणे भगवं महावीरे अइमुत्तस्स कुमारस्स तीसे य धम्ममाइक्खइ, धम्मं सोच्चा निसम्म हट्ठुत्ते जाव जं नवरं- देवाणुप्पिया! अम्मापियरो आपुच्छामि, तए णं अहं देवणुप्पियाणं अंतिए जाव पव्वयामि, अहासुहं देवाणुप्पिया०।

तए णं से अइमुत्ते कुमारे जेणेव अम्मापियरो तेणेव उवगाए जाव पव्वइत्तए, तए णं तं अइमुत्तं कुमारं अम्मापियरो एवं वयासी-बाले सि ताव तुमं पुत्ता! असंबुद्धे०, किं णं तुमं जाणसि धम्मं?

तए णं से अइमुत्ते कुमारे अम्मापियरो एवं वयासी-एवं खलु अहं अम्माओ! जं चेव जाणामि तं चेव न जाणामि जं चेव न जाणामि तं चेव जाणामि ।

तए णं तं अइमुत्तं कुमारं अम्मापियरो एवं वयासी-कहं णं तुमं पुत्ता! जं चेव जाणसि तं चेव न जाणसि जं चेव न जाणसि तं चेव जाणसि ।

तए णं से अइमुत्ते कुमारे अम्मापियरो एवं वयासी-जाणामि अहं अम्मयाओ! जहा- जाएणं अवस्स मरियव्वं न जाणामि अहं अम्मयाओ! काहे वा कहिं वा कहं वा कियच्चिरेणं वा न जाणामि णं वग्गो-६, अज्झयणं-१५

अम्मयाओ! केहिं कम्मायणेहिं जीवा नेरइय-तिरिक्खजोणिय-मणुस्से-देवेसु उववज्जंति जाणामि णं अम्मयाओ! जहा- सएहिं कम्माययणेहिं जीवा नेरइया-जाव उववज्जंति, एवं खलु अहं अम्मयाओ! जं चेव जाणामि तं चेव न जाणामि जं चेव न जाणामि तं चेव जाणामि, तं इच्छाणि णं अम्मयाओ तुब्भेहिं अब्भणुण्णाए जाव पव्वइत्तए ।

तए णं तं अइमुत्तं कुमारं अम्मापियरो जाहे नो संचाएंति बहूहिं आघवणाहि० जाव तं इच्छामो ते जाया! एगदिवसमवि रायसिरिं पासेत्तए, तए णं से अइमुत्ते कुमारे अम्मापिउवयणमणुयत्तमाणे तुसिणीए संचिद्धइ, अभिसेओ जहा- महब्बलस्स निक्खमणं जाव सामाइयमाइयाइं० अहिज्जइ, बहूइं वासाइं सामण्णपरियागं पाउणइ गुणरयणं तवोकम्मं जाव विपुले सिद्धे ।

◦ छट्ठे वग्गे पन्नरसमं अज्झयणं समत्तं ◦

◻ सोलसमं-अज्झयणं-अलक्के ◻

[४०] तेणं कालेणं तेणं समएणं वाणारसी नयरी, काममहावणे चेइए, तत्थ णं वाणारसीए अलक्खे नामं राया होत्था, तेणं कालेणं तेणं समएणं समणे भगवं महावीरे जाव विहरइ, परिसा निग्गया तए णं अलक्खे राया इमीसे कहाए लद्धट्ठे हट्ठुत्ते जहा- कोणिए जाव पज्जुवासइ, धम्मकहा०

तए णं से अलक्खे राया समणस्स भगवओ महावीरस्स अंतिए जहा- उदायणे तहा निक्खंते नवरं-जेट्ठुत्तं रज्जे अभिसिंचइ एक्कारस अंगाइं बहू वासा परियओ जाव विपुले सिद्धे ।

एवं खलु जंबू समणेणं जाव छट्ठमस्स वग्गस्स अयमट्ठे पन्नत्ते ।

◦ छट्ठे वग्गे सोलसमं अज्झयणं समत्तं ◦

() छट्ठो वग्गो समत्तो ()

◦ मुनि दीपरत्नसागरेण संशोधितः सम्पादित्तश्च छट्ठो वग्गो समत्तो ◦

◦ सत्तमो-वग्गो ◦

[] पढमं-अज्झयणं []

[४१] जइ णं भंते! सत्तमस्स वग्गस्स उक्खेवओ जाव तेरस अज्झयणा पन्नत्ता तं जहा-

|

[४२] नंदा तह नंदवई नंदुत्तर नंदिसेणिया चेव ।

मरूवा सुमरूत्ता महमरूत्ता मरूदेवा य अट्टमा ॥

[४३] भद्दा य सुभद्दा य सुजाया सुमणाइया ।

भूयदिण्णा य बोधच्चा सेणियभज्जाण नामाइं ॥

[४४] जइ णं भंते० तेरस अज्झयणा पन्नत्ता पढमस्स णं भंते! अज्झयणस्स अंतगडदसाणं के अट्टे पन्नत्ते?, एवं खलु जंबू! तेणं कालेणं तेणं समएणं रायगिहे नयरे, गुणसिलए चेइए, सेणिए राया वण्णओ, तस्स णं सेणियस्स रण्णो नंदा नाम देवी होत्था-वण्णओ, सामी समोसदे, परिसा निग्गया, तए णं सा नंदा देवी इमीसे कहाए लद्धट्ठा० कोडुंबियपुरिसे सद्दावेइ सद्दावेत्ता, जाणं दुरुहइ जहा-पउमावई जाव एक्कारस अंगाइं अहिज्जित्ता वीसं वासाइं परियाओ जाव सिद्धा ।

० सत्तमे वग्गे पढमं अज्झयणं समत्तं ०

वग्गो-७, अज्झयणं/-२-१३

[] २-१३-अज्झयणाणि []

[४५] एवं तेरस वि देवीओ नंदागमेण नेयच्चाओ ।

() सत्तमो वग्गो समत्तो ()

० मुनि दीपरत्नसागरेण संशोधितः सम्पादित्तश्च सत्तमो वग्गो समत्तो ०

० अट्टमो-वग्गो ०

[] पढमं-अज्झयणं- काली []

[४६] जइ णं भंते! अट्टमस्स वग्गस्स उक्खेवओ जाव दस अज्झयणा पन्नत्ता तं जहा- ।

[४७] काली सुकाली महाकाली कण्हा सुकण्हा महाकण्हा ।

वीरकण्हा य बोधच्चा रामकण्हा तहेव य ।

पिउसेणकण्हा नवमी दसमी महासेणकण्हा य ॥

[४८] जइ अट्टमस्स अंगस्स दस अज्झयणा पन्नत्ता, पढमस्स अज्झयणस्स अंतगड-दसाणं के अट्टे पन्नत्ते? एवं खलु जंबू! तेणं कालेणं तेणं समएणं चंपा नामं नयरी होत्था, पुन्नभट्टे चेइए, तत्थ णं चंपाए नयरीए कोणिए राया-वण्णओ, तत्थ णं चंपाए नयरीए सेणियस्स रण्णो भज्जा कोणियस्स रण्णो चुल्लमाउया काली नामं देवी होत्था-वण्णओ, जहा- नंदा जाव सामाइयमाइयाइं एक्कारस अंगाइं अहिज्जइ बहूहिं चउत्थ० जाव अप्पाणं भावेमाणी विहरइ ।

तए णं सा काली अज्जा अण्णया कयाइ जेणेव अज्जचंदणा अज्जा तेणेव उवागया उवा-गच्छित्ता एवं वयासी-इच्छामि णं अज्जाओ! तुब्भेहिं अब्भणुण्णया समाणी रयणावलिं तवं उवसंपज्जित्ता णं विहरित्तए, अहासुहं० तए णं सा काली अज्जा अज्जचंदणाए अब्भणुण्णया समाणी रयणावलिं तवं उवसंपज्जित्ता णं विहरइ तं जहा -

चउत्थं करेइ, करेत्ता सव्वकामगुणियं पारेइ, पारेत्ता छट्ठं करेइ करेत्ता सव्वकामगुणियं पारेइ, अट्ठमं करेइ करेत्ता सव्वकामगुणियं पारेइ, अट्ठं छट्ठाइं करेइ करेत्ता सव्वकामगुणियं पारेइ, चउत्थं करेइ करेत्ता सव्वकामगुणियं पारेइ, छट्ठं करेइ करेत्ता सव्वकामगुणियं पारेइ, अट्ठमं करेइ करेत्ता सव्वकामगुणियं पारेइ, दसमं करेइ करेत्ता सव्वकामगुणियं पारेइ, दुवालसमं करेइ करेत्ता सव्वकामगुणियं पारेइ, चोद्धसमं करेइ करेत्ता सव्वकामगुणियं पारेइ, सोलसमं करेइ करेत्ता सव्वकामगुणियं पारेइ, अट्ठारसमं करेइ करेत्ता सव्वकामगुणियं पारेइ, वीसइमं करेइ करेत्ता सव्वकामगुणियं पारेइ बावीसइमं करेइ करेत्ता सव्वकामगुणियं पारेइ चउवीसइमं करेइ करेत्ता सव्वकामगुणियं पारेइ, छव्वीसइमं करेइ करेत्ता सव्वकामगुणियं पारेइ, अट्ठावीसइमं करेइ करेत्ता सव्वकामगुणियं पारेइ, तीसइमं करेइ करेत्ता सव्वकामगुणियं पारेइ, बत्तीसइमं करेइ करेत्ता सव्वकामगुणियं पारेइ, चोत्तीसइमं करेइ करेत्ता सव्वकामगुणियं पारेइ, चोत्तीसं छट्ठाइं करेइ करेत्ता सव्वकामगुणियं पारेइ ।

चोत्तीसइमं करेइ करेत्ता सव्वकामगुणियं पारेइ, बत्तीसइमं करेइ करेत्ता सव्वकामगुणियं पारेइ तीसइमं करेइ करेत्ता सव्वकामगुणियं पारेइ, अट्ठावीसइमं करेइ करेत्ता सव्वकामगुणियं पारेइ, छव्वीसइमं करेइ करेत्ता सव्वकामगुणियं पारेइ, चउवीसइमं करेइ करेत्ता सव्वकामगुणियं पारेइ, बावीसइमं करेइ करेत्ता वग्गो-८, अज्झयणं-१

सव्वकामगुणियं पारेइ, वीसइमं करेइ करेत्ता सव्वकामगुणियं पारेइ, अट्ठारसमं करेइ करेत्ता सव्वकामगुणियं पारेइ, सोलसमं करेइ करेत्ता सव्वकामगुणियं पारेइ, चोद्धसमं करेइ करेत्ता सव्वकामगुणियं पारेइ, बारसमं करेइ करेत्ता सव्वकामगुणियं पारेइ, दसमं करेइ करेत्ता सव्वकामगुणियं पारेइ, अट्ठमं करेइ करेत्ता सव्वकामगुणियं पारेइ, छट्ठं करेइ करेत्ता सव्व० पारेइ, चउत्थं करेइ करेत्ता सव्वकामगुणियं पारेइ,

एवं खलु एसा रयणावलीए तवोकम्मस्स पढमा परिवाडी एगेणं संवच्छरेणं तिहिं मासेहिं बावीसाए य अहोरत्तेहिं अहासुत्तं जाव आराहिया भवइ, तयाणंतरं च णं दोच्चाए परिवाडीए चउत्थं करेइ करेत्ता विगइवज्जं पारेइ, छट्ठं करेइ करेत्ता विगइवज्जं पारेइ. एवं जहा- पढमाए वि नवरं- सव्वपारणए विगइवज्जं पारेइ जाव आराहिया भवइ, तयाणंतरं च णं तच्चाए परिवाडीए चउत्थं करेइ करेत्ता अलेवाडं पारेइ सेसं तहेव, नवरं नलेवाडं पारेइ, एवं चउत्था परिवाडी नवरं सव्वपारणए आयंबिलं पारेइ सेसं तं चेव।

[४९] पढमंमि सव्वकामं पारणयं बिइयए विगइवज्जं ।

तइयंमि अलेवाडं आयंबिलमो चउत्थंमि ॥

[५०] तए णं सा काली अज्जा रयणवली-तवोकम्मं पंचहिं संवच्छरेहिं दोहि य मासेहिं अट्ठावीसाए य दिवसेहिं अहासुत्तं जाव आराहेत्ता जेणेव अज्जचंदणा अज्जा तेणेव उवागच्छइ उवागच्छित्ता अज्जचंदणं अज्जं वंदइ नमंसइ वंदित्ता नमंसित्ता बहूहिं चउत्थ जाव अप्पाणं भावेमणी विहरइ

तए णं सा काली अज्जा तेणं ओरालेणं जाव धमणिसंतया जाया यावि होत्था से जहा- इंगाल० जाव सुहुयहुयासणे इव भासरासिपलिच्छण्णा तवेणं तेणं तवतेयसिरीए अईव-अईव उवसोहेमाणी- उवसोहेमाणी चिड्डइ, तए णं तीसे कालीए अज्जाए अण्णया कयाइ पुव्वरत्तावरत्ताकाले अयमज्झत्थिए० जहा- खंदयस्स चिंता जहा जाव अत्थि उट्ठाणे कम्ममे बले वीरिए पुरिसक्कार-परक्कमे तावता मे सेयं

कल्लं० जाव जलंते० अज्जचंदणं अज्जं आपुच्छित्ता अज्जचंदणाए अज्जाए अब्भणुण्णायए समाणीए संलेहणा-झूसणा-झूसियाए भत्तपाण-पडियाइक्खियाए कालं अणवकंखमाणीए विहरित्तेए त्ति कट्ठु एवं संपेहेइ संपेहेत्ता कल्लं जेणेव अज्जचंदणा अज्जा तेणेव उवागच्छइ उवागच्छित्ता अज्जचंदणं अज्जं वंदइ नमंसइ वंदित्ता नमंसित्ता एवं वयासी-

इच्छामि णं अज्जो! तुब्भेहिं अब्भणुण्णायया समाणी संलेहणा-जाव विहरित्तेए, अहासुहं०, तए णं सा काली अज्जा अज्जचंदणाए अब्भणुण्णायया समाणी संलेहणा झूसियो-जाव विहरइ, तए णं सा काली अज्जा अज्जचंदणाए अंतिए सामाइयमाइयाइं एक्कारस अंगाइं अहिज्जित्ता बहुपडिपुन्नाइं अट्ठ संवच्छराइं सामण्णपरियागं पाउणित्ता मासियाए संलेहणाए अत्ताणं झूसित्ता सट्ठिं भत्ताइं अणसणाए छेदित्ता जस्स-ट्ठाए कीरति नग्गभावे जाव चरिमुस्सासनीसेहिं सिद्धा, निक्खेवओ अज्झयणं ।

० अट्ठमे वग्गे पढमं अज्झयणं समत्तं ०

□ बीयं अज्झयणं-सुकाली □

[५१] तेणं कालेणं तेणं समएणं चंपा नामं नयरी, पुन्नभद्धे चेइए, कोणिए राया, तत्थ णं सेणियस्स रण्णो भज्जा कोणियस्स रण्णो चुल्लमाउया सुकाली नामं देवी होत्था, जहा- काली तहा सुकाली वि निक्खंता जाव बहूहिं जाव तवोकम्महिं अप्पाणं भावेमाणी विहरइ ।

तए णं सा सुकाली अज्जा अण्णया कयाइ जेणेव अज्जचंदणा अज्जा जाव इच्छामि णं वग्गो-८, अज्झयणं-२

अज्जो! तुब्भेहिं अब्भणुण्णायया समाणी कणगावली-तवोकम्मं उवसंपज्जित्ता णं विहरित्तेए, एवं जहा- रयणावली तहा कणगावली वि, नवरं-तिसु ठाणेसु अट्ठमाइं करेइ जहा- रयणावलीए छट्ठाइं एक्काए परिवाडीए संवच्छरो पंच मासा बारस य अहोरत्ता चउण्हं पंच वरिसा नव मासा अट्ठारस दिवसा सेसं तहेव, नव वासा परियाओ जाव सिद्धा ।

० अट्ठमे वग्गे बीयं अज्झयणं समत्तं ०

□ तइयं अज्झयणं-महाकाली □

[५२] एवं-महाकाली वि, नवरं-खुड्डागं सीहनिककीलियं तवोकम्मं उवसंपज्जित्ता णं विहरइ, तं जहा- चउत्थं करेइ करेत्ता सव्वकामगुणियं पारेइ पारेत्ता छट्ठं करेइ करेत्ता सव्वकामगुणियं पारेइ, चउत्थं करेइ करेत्ता सव्वकामगुणियं पारेइ, अट्ठमं करेइ करेत्ता सव्वकामगुणियं पारेइ, छट्ठं करेइ करेत्ता सव्वकामगुणियं पारेइ, दसमं करेइ करेत्ता सव्वकामगुणियं पारेइ, अट्ठमं करेइ करेत्ता सव्वकामगुणियं पारेइ, दुवाल-समं करेइ करेत्ता सव्वकामगुणियं पारेइ, दसमं करेइ करेत्ता सव्वकामगुणियं पारेइ, चोद्धसमं करेइ करेत्ता सव्वकामगुणियं पारेइ, दुवालसं करेइ करेत्ता सव्वकामगुणियं पारेइ, सोलसमं करेइ करेत्ता सव्वकामगुणियं पारेइ, चोद्धसमं करेइ करेत्ता सव्वकामगुणियं पारेइ, अट्ठारसमं करेइ करेत्ता सव्वकामगुणियं पारेइ, सोलसमं करेइ करेत्ता सव्वकामगुणियं पारेइ वीसइमं करेइ करेत्ता सव्वकामगुणियं पारेइ, अट्ठारसमं करेइ करेत्ता सव्वकामगुणियं पारेइ, वीसइमं करेइ करेत्ता सव्वकामगुणियं पारेइ, सोलसमं करेइ करेत्ता सव्वकामगुणियं पारेइ, अट्ठारसमं करेइ करेत्ता सव्वकामगुणियं पारेइ चोद्धसमं करेइ करेत्ता सव्वकामगुणियं पारेइ, सोलसमं करेइ करेत्ता सव्वकामगुणियं पारेइ, बारसमं करेइ करेत्ता

सव्वकामगुणियं पारेइ. चोदसमं करेइ करेत्ता सव्वकामगुणियं पारेइ, दसमं करेइ करेत्ता सव्वकामगुणियं पारेइ, बारसमं करेइ करेत्ता सव्वकामगुणियं पारेइ अट्टमं करेइ करेत्ता सव्वकामगुणियं पारेइ दसमं करेइ करेत्ता सव्वकामगुणियं पारेइ छट्ठं करेइ करेत्ता सव्वकामगुणियं पारेइ अट्टमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ छट्ठं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ तहेव चत्तारि परिवाडीओ, एक्काए परिवाडीए छम्मासा सत्त य दिवसा चउण्हं दो वरिसा अट्ठावीसा य दिवसा जाव सिद्धा ।

◦ अट्टमे वग्गे तइअं अज्झयणं समत्तं ◦

◻ चउत्थं अज्झयणं-कण्हा ◻

[५३] एवं-कण्हा वि नवरं-महालयं सीहणिककीलियं तवोकम्मं जहेव खुड्डागं नवरं-चोत्तीसइमं जाव नेयव्वं तहेव ओसारेयव्वं, एक्काए वरिसं छम्मासा अट्ठारस य दिवसा चउण्हं छव्वरिसा दोमासा बारस य अहोरत्ता, सेसं जहा- कालीए जाव सिद्धा ।

◦ अट्टमे वग्गे चउत्थं अज्झयणं समत्तं ◦

◻ पंचमं अज्झयणं-सुकण्हा ◻

[५४] एवं-सुकण्हा वि नवरं-सत्तसत्तमियं भिक्खुपडिमं उवसंपज्जित्ता णं विहरइ, पढमे सत्तए एककेक्कं भोयणस्स दत्तिं पडिगाहेइ एककेक्कं पाणयस्स, दोच्चे सत्तए दो-दो भोयणस्स दो-दो पाणयस्स पडिगाहेइ, तच्चे सत्तए तिण्णि-तिण्णि दत्तीओ भोयणस्स तिण्णि-तिण्णि दत्तीओ पाणयस्स, चउत्थे पंचमे

वग्गो-८, अज्झयणं-५

छट्ठे सत्तमे सत्तए सत्त-सत्त दत्तीओ भोयणस्स सत्त-सत्त दत्तीओ पाणयस्स पडिगाहेइ, एवं खलु एयं सत्तस-त्तमियं भिक्खुपडिमं एगूणपन्नाए रातिंदिएहिं एगेणं य छन्नउएण भिक्खासएणं अहासुत्तं जाव आराहेत्ता जेणेव अज्जचंदणा अज्जा तेणेव उवागया उवागच्छित्ता उज्जचंदणं अज्जं वंदइ नमंसइ वंदित्ता नमंसित्ता एवं वयासी-

इच्छामि णं अज्जाओ तुब्भेहिं अब्भणुण्णाया समाणी अट्टमियं भिक्खुपडिमं उवसंपज्जित्ता णं विहरेत्तए, अहासुहं० तए णं सा सुकण्हा अज्जा अज्जचंदणाए अज्जाए अब्भणुण्णाया समाणी अट्टमियं भिक्खुपडिमं उवसंपज्जित्ता णं विहरइ, पढमे अट्टए एककेक्कं भोयणस्स दत्तिं पडिगाहेइ एककेक्कं पाणयस्स जाव अट्टमे अट्टए अट्टमि भोयणस्स पडिगाहेइ अट्टमि पाणयस्स, एवं खलु एयं अट्टमियं भिक्खुपडिमं चउसट्ठीए रातिंदिएहिं दोहि य अट्ठासीएहिं भिक्खासएहिं अहासुत्तं आराहेत्ता जाव नवनवमियं भिक्खुपडिमं उवसंपज्जित्ता णं विहरइ- पढमे नवए एककेक्कं भोयणस्स दत्तिं पडिगाहेइ एककेक्कं पाणयस्स जाव नवमे नवए नव-नव दत्तीओ भोयणस्स पडिगाहेइ नव-नव पाणयस्स,

एवं खलु एयं नवनवमियं भिक्खुपडिमं एककासीतिए राइंदिएहिं चउहिं य पंचुत्तरेहिं भिक्खा-सएहिं अहासुत्तं आराहेत्ता जाव दसदसमियं भिक्खुपडिमं उवसंपज्जित्ता णं विहरइ-पढमे दसए एककेक्कं भोयणस्स दत्तिं पडिगाहेइ एककेक्कं पाणयस्स जाव दसमे दसए दस-दस दत्तीओ भोयणस्सपडिगाहेइ दस-दस पाणयस्स एवं खलु एयं दस दसमियं भिक्खुपडिमं एककेणं राइंदियसएणं अट्टछट्ठेहिं य भिक्खासएहिं अहासुत्तं जाव आराहेइ आराहेत्ता बहूहिं चउत्थ जाव मासद्धमासखमणेहिं

विविहेहिं तवोकम्मेहिं अप्पाणं भावेमाणी विहरइ, तए णं सा सुकण्हा अज्जा तेणं ओरालेणं तवोकम्मेणं जाव सिद्धा,

निक्खेवओ अज्झयणा ।

◦ अट्ठमे वग्गे पंचमं अज्झयणं समत्तं ◦

□ छट्ठं अज्झयणं- महाकण्हा □

[५५] एवं-महाकण्हा वि नवरं-खुड्डागं सव्वओभट्ठं पडिमं उवसंपज्जित्ताणं विहरइ, चउत्थं करेइ करेत्ता सव्वकामगुणियं पारेइ पारेत्ता छट्ठं करेइ करेत्ता सव्वकामगुणियं पारेइ अट्ठमं करेइ करेत्ता सव्वकामगुणियं पारेइ दसमं करेइ करेत्ता सव्वकामगुणियं पारेइ दुवालसमं करेइ करेत्ता सव्वकामगुणियं पारेइ अट्ठमं करेइ करेत्ता सव्वकामगुणियं पारेइ दसमं करेइ करेत्ता सव्वकामगुणियं पारेइ, दुवालसमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ छट्ठं करेइ करेत्ता सव्वकामगुणियं पारेइ । दुवालसमं करेइ करेत्ता सव्वकामगुणियं पारेइ, चउत्थं करेइ करेत्ता सव्वकामगुणियं पारेइ । छट्ठं करेइ करेत्ता सव्वकाम◦ अट्ठमं करेइ करेत्ता सव्वकाम◦ दसमं करेत्ता सव्वकाम◦ छट्ठं◦ सव्व◦ अट्ठमं करेइ करेत्ता सव्वकाम◦ ।

दसमं करेइ करेत्ता सव्वकामगुणियं पारेइ दुवालसमं करेइ करेत्ता सव्वकामगुणियं पारेइ, चउत्थं करेइ करेत्ता सव्वकामगुणियं पारेइ दसमं करेइ करेत्ता सव्वकामगुणियं पारेइ दुवालसमं करेइ करेत्ता सव्वकामगुणियं पारेइ चउत्थं◦ सव्व◦, छट्ठं◦ सव्व◦, अट्ठमं◦ सव्वकाम◦ एवं खलु एयं खुड्डागसव्व-ओभट्ठस्स तवोकम्मस्स पढमं परिवाडिं तिहिं मासेहिं दसहिं य दिवसेहिं अहासुत्तं जाव आराहेत्ता दोच्चाए परिवाडीए चउत्थं करेइ करेत्ता विगइवज्जं पारेइ पारेत्ता जहा- रयणावलीए तहा एत्थ वि चत्तारि परिवाडीओ

वग्गो-८, अज्झयणं-६

पारणा तहेव चउण्हं कालो संवच्छरो मासो दस य दिवसा सेसं तहेव जाव सिद्धा, निक्खेवओ अज्झयणं ।

◦ अट्ठमे वग्गे छट्ठं अज्झयणं समत्तं ◦

□ सत्तमं अज्झयणं-वीरकण्हा □

[५६] एवं-वीरकण्हा वि नवरं-महालयं सव्वओभट्ठं तवोकम्मं उवसंपज्जित्ता णं विहरइ तं जहा- चउत्थं करेइ करेत्ता सव्वकामगुणियं पारेइ छट्ठं करेइ करेत्ता सव्वकामगुणियं पारेइ अट्ठमं करेइ करेत्ता सव्वकामगुणियं पारेइ दसमं करेइ करेत्ता सव्वकामगुणियं पारेइ दुवालसमं करेइ करेत्ता सव्वकामगुणियं पारेइ चोद्धसमं करेइ करेत्ता सव्वकामगुणियं पारेइ सोलसमं करेइ करेत्ता सव्वकामगुणियं पारेइ दसमं करेइ करेत्ता सव्वकामगुणियं पारेइ दुवालसमं करेइ करेत्ता सव्वकामगुणियं पारेइ चोद्धसमं करेइ करेत्ता सव्वकामगुणियं पारेइ सोलसमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ छट्ठं करेइ करेत्ता सव्वकामगुणियं पारेइ अट्ठमं करेइ करेत्ता सव्वकामगुणियं पारेइ सोलसमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ छट्ठं करेइ करेत्ता सव्वकामगुणियं पारेइ अट्ठमं करेइ करेत्ता सव्वकामगुणियं पारेइ दसमं करेइ करेत्ता सव्वकामगुणियं पारेइ दुवालसमं करेइ करेत्ता सव्वकामगुणियं पारेइ चोद्धसमं करेइ करेत्ता सव्वकामगुणियं पारेइ अट्ठमं करेइ करेत्ता सव्वकामगुणियं पारेइ दसमं करेइ करेत्ता सव्वकामगुणियं

□ नवमं अज्झयणं-पिउसेणकण्हा □

[५८] एवं-पिउसेणकण्हा वि नवरं-मुत्तावलिं तवोकम्मं उवसंपज्जित्ता णं विहरइ तं जहा-चउत्थं करेइ करेत्ता सव्वकामगुणियं पारेइ छइं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ अइमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ दसमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ दुवालसमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ चोद्धसमं करेइ करेत्ता सव्वकाम-गुणियं पारेइ चउत्थं करेइ करेत्ता सव्वकामगुणियं पारेइ सोलसमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ अद्वारसमं करेइ करेत्ता सव्वकामगुणियं पारेइ ।

चउत्थं करेइ करेत्ता सव्वकामगुणियं पारेइ वीसइमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ बावीसइमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ चउवीसइमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ छव्वीसइमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ अद्वीसइमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ तीसइमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ बत्तीसइं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ चोत्तीसइमं करेइ करेत्ता सव्वकामगुणियं पारेइ चउत्थं करेइ करेत्ता सव्वकामगुणियं पारेइ बत्तीसइमं करेइ करेत्ता सव्वकामगुणियं पारेइ एवं तहेव ओसारेइ जाव चउत्थं करेइ करेत्ता सव्वकामगुणियं पारेइ ।

एक्काए कालो एक्कारस मासा पन्नरस य दिवसा चउण्हं तिण्णि वरिसा दस य मासा सेसं जाव सिद्धा ।

◦ अइममे वग्गे नवमं अज्झयणं समत्तं ◦

□ दसमं अज्झयणं-महासेणकण्हा □

[५९] एवं-महासेणकण्हा वि नवरं-आयंबिलवड्डमाणं तवोकम्मं उपसंपज्जित्ता णं विहरइ, तं जहा- आयंबिलं करेइ करेत्ता चउत्थं करेइ, बे आयंबिलाइं करेइ करेत्ता चउत्थं करेइ, तिण्णि आयंबिलाइं

वग्गो-८, अज्झयणं-१०

करेइ करेत्ता चउत्थं करेइ, चत्तारि आयंबिलाइं करेइ करेत्ता चउत्थं करेइ, पंच आयंबिलाइं करेइ करेत्ता चउत्थं करेइ छ आयंबिलाइं करेइ करेत्ता चउत्थं करेइ एवं एककुत्तरियाए वड्डीए आयंबिलाइं वड्ढंति चउत्थंतरियाइं जाव आयंबिलसयं करेइ करेत्ता चउत्थं करेइ ।

तए णं सा महासेणकण्हा अज्जा आयंबिलवड्डमाणं तवोकम्मं चोद्धसहिं वासेहिं तिहि य मासेहिं वीसहि य अहोरत्तेहिं अहासुत्तं जाव आराहेत्ता जेणेव अज्जचंदणा अज्जा तेणेव उवागया उवा-गच्छित्ता जाव नमंसित्ता बहूहिं चउत्थेहिं जाव भावेमाणी विहरइ ।

तए णं सा महासेणकण्हा अज्जा तेणं ओरालेणं जाव उवसोहेमाणी चिड्डइ, तए णं तीसे महासेणकण्हाए अज्जाए अण्णया कयाइं पुव्वरत्तावरत्तकाले चिंता जहा- खंदयस्स जाव अज्जचंदणं अज्जं आपुच्छइ जाव संलेहणा, कालं अणवक्खंमाणी विहरइ ।

तए णं सा महासेणकण्हा अज्जा अज्जचंदणाए अज्जाए अंतिए सामाइयमाइयाइं एक्कारस अंगाइं अहिज्जित्ता बहुपडिपुन्नाइं सत्तरस वासाइं परियायं पालइत्ता मासियाए संलेहणाए अप्पाणं झूसित्ता सद्धिं भत्ताइं अणसणाए छेदित्ता जस्सट्ठाए कीरइ नग्गभावे जाव तमइं आराहेइ आराहेत्ता चरिमउस्सासनिस्सासेहिं सिद्धा बुद्धा ।

[६०] अइ य वासा आई एक्कोत्तरयाए जाव सत्तरस ।

एसो खलु परियाओ सेणियभज्जाण नायव्वो ॥

[६१] एवं खलु जंबू! समणेणं भगवया महावीरेणं जाव संपत्तेणं अइमस्स अंगस्स अंतगडदसाणं अयमट्ठे पन्नत्ते ।

[६२] अंतगडदसाणं अंगस्स एगो सुयखंधो अइ वग्गा अइसु चेव दिवसेसु उद्धिसिज्जंति तत्थ पढमबिइयवग्गे दस-दस उद्देसगा तइयवग्गे तेरस उद्देसगा चउत्थपंचमवग्गे दस-दस उद्देसगा छट्ठ-वग्गे सोलस उद्देसगा सत्तमवग्गे तेरस उद्देसगा अइमवग्गे दस उद्देसगा सेसं जहा- नायाधम्मक-हाणं ।

◦ अइमे वग्गे दसमं अज्झयणं समत्तं ◦

◦ अइमो वग्गो समत्तो ◦

◦ मुनि दीपरत्नसागरेण संशोधितः सम्पादित्तश्च अइमो वग्गो समत्तो ◦

८	अंतगडदसाओ अइमं अंगसुत्तं समत्तं
---	--

◦ मुनि दीपरत्नसागरेण संशोधितः सम्पादित्तश्च अंतगडदसाओ समत्तो

◦